


樓山堂集(四)
交行摘稿





樓山堂集

(四)

吳應昇著

編主五雲王
編初成集書叢
種一他其及集堂山樓
冊 四

中華民國二十四年十二月初版

平美

發行人

王 雲 五
上海河南路

印刷所

商 務 印 書 館
上海河南路

發行所

商 務 印 書 館
上海及各埠

樓山堂集第二十三卷

詩

七言古

吁嗟行

吁嗟我生二十餘。學書學劍空踟蹰。前年上策不得報。今年流落復如初。先人有屋遭焚棄。况無薄田可
耘鋤。父老謂我方壯盛。且復低眉穿魯魚。丈夫要當立天地。區區不用早瓊琚。君不見昔人寂寂愧鄧禹。
至今身名等邱墟。吁嗟我生二十餘。

婆護歌非注婆護與父小字

伯宗佳兒甫九齡。能誦伯宗詩。併能誦余詩。且呼余伯也。因許贈以長篇。伯宗亦許代報焉。

上帝之居何突絕。中有散吏多宕跌。乘龍每下人閒世。世人往往詫宿哲。劉也與吳相提挈。猶記帝庭同
顰蹙。乃知今得忝詞場。爲是清班曾占竊。我嘗執此傲風塵。佳兒難得如星辰。不知真宰何以不解忌。劉
也乃復挺此石麒麟。嗟爾靡兒齡甫九。疏眉玉映氣如吼。腹笥已儲典午前。唐詩亦誦數百首。謂此塾師
能授之。不分遂解家色絲。卽如庭趨頓阿好。野鷺奚其更不遺。對禽辨李羞早智。磔鼠檄雞了不啻。杜老

題詩故自寬。陶翁飲酒應來喟。矧予自許斯慧業。好弄茲辰未識字。我與伯宗稱雁行。少年郡國早知名。吳氏世甯有季子。卽看欵向已輸卿。他年善奮垂天翮。無負今時呼我伯。願我豈緣藻麗盟。遡源元共神仙籍。嗚呼佳兒九歲解知詩。向父得詩亟呼奇。自言不審瑤華報。卽煩爾父代爾爲。

客有示予文文山字卷者。筆勢生動。蓋真蹟也。其詩爲過平原弔顏魯公七言古。予覽而感之。

山窗寒月景幽艱。與客評書一放顏。開卷尺許氣生動。圖窮款識文文山。憶昔少時負書癖。典裘購得先生籍。中夜起讀不能眠。一讀一泪摧心魄。平原古風奇之奇。生恨魯公不同時。未減希烈罵盧杞。日月慘澹天地悲。此詩不下杜工部。豈期書學更過之。筆力要與爭坐絜。點畫撇捺皆精血。拂拂十指有同符。吉水之帶常山舌。世稱忠義略詩字。意謂區區非所屑。逢比不聞工六法。芝繇那必敦三節。先生一身備數器。浩氣發舒皆擅絕。嗚呼此卷真擅絕。

蘇州行

蘇州古俠死已久。墓傍春草年年茂。萬載流風自足存。如今奮椎又屠狗。諸生大哭軍門前。百姓呼號奮徒手。須臾緹騎鳥獸奔。天子之詔吾何有。爾時官長汗浹背。縲臣夜半單舸走。民間訛言屠一城。聖人憫亂殲渠首。嗚呼天下幾蘇州。嗚呼五人名不朽。

悲東莞

東莞袁公平臺對。自言□□五載內。天子暫釋附髀思。九塞一時增敵愾。予也感事竊致疑。兵者呼吸難

豫期平羌未聞數反覆。高平何人能主持。豈知□今已入口。疾走大梁君何有。擁師不復一矢遺。夜半子反已中酒。道路喧譁不可聽。懷光卒恐負朝廷。宮中聖人調兵食。東市頃刻已行刑。嗚呼東莞真可哀。三錫承天安在哉。百萬生靈售一命。眼前富貴直蒿萊。丈夫殺身何足恤。要使功名垂竹帛。楊鎬熊王等死耳。何如當年屍裹革。汝夔旣斬守謙誅。仇鸞不復矢一鏃。卽今跋扈將軍在。上國何人更□□。獨使至尊憂社稷。卿大夫恥胡爲乎。

相公墩有千葉榴花二株花時甚盛因念其始植之日爲作此

舊時榴本大如指。親見老僧植庭際。距今十載人未改。雙樹已作雲霞勢。火齊粒粒向人吐。交枝接葉紛相舞。偃蹇新荷尙帶泥。三月桃花棄如土。此時此花好顏色。守宮血綻佳人輔。丹砂含露未全傾。解瓣鮮明日停午。有時烟霧晝冥冥。萬尺珊瑚碎作雨。近聞京口茜如金。染得紅裙那能賭。人家園子費萬緡。移花購樹鬪嬋娟。此花絕豔無知者。寄置空門年復年。出塞王嬙比不得。入道宮人倍可憐。湖中水起一色天。爛漫花枝景欲燃。我欲拈花同一笑。不知榴是九臺蓮。

報仇行贈黔中陸生

灌夫一戟馳吳壁。手殺父仇軍辟易。至今萬載鬚眉生。乃有陸生稱嘆惜。生視灌夫難之難。爲奴季布歷閒關。左手殺仇露血刃。右手挈弟俾生還。此時帥府煽爲虐。生陳大義趨鼎鑊。精變日月天地動。遂巡亦使豺聲卻。世閒忠孝久陸沈。左衽冠裳已見今。侍中之血常山舌。爲之異地歆盍簪。嗚呼世有陸生而後

有人心。

集藍園贈兩吳子非注子舍去非也

丹山園子水之涓。水曲亭空深且漪。主人醉客日欲暮。高樹雲停清風披。我來十日耽遊涉。性情直與川雲浹。世閒好友傾人命。况復淪漣動心脇。布心不聞譚名理。雲機那能爭氣烈。以茲二子未徒然。缸盡膏殘見冰雪。古藤垂蔓露欲晞。深簷瓦白鳥亂啼。更闌月色窺人甚。何處鐘聲送客歸。

吳去塵弒寄詩西湖并所製墨

故人念我湖之濱。貽書一握道艱辛。墨光置錦護青旻。七言不盡聲隱鱗。霜風昨夜發西冷。紅樹曉起炤東鄰。我欲持之還相贈。安得詩工爾不貧。

王侯歌有序

參憲王達卿建和先生于里中營墅鑿池。池固有石鑿成而石出蔽水。大辟象軀。小攤鵠翮。奇形詭狀。不可殫述。先生樂焉。構亭其上。既自爲記。又以額使予書之。因贈。

王侯解政遂初服。竹里深山成野築。鑿池池開石露穎。先生趣之窮根族。須臾池深石益見。玉筍新班驚鏃鏃。衆工舉舂不能停。要使形態窮剔劇。引泉灌之方鑿開。巖壑居然倒一幅。奔猊駭獸傍側見。兔起鶻落相倚伏。厥狀窈窕不可名。蕩漾一勺生王屋。此石塵土千萬年。一朝振衣出新沐。孫陽不遇驥垂耳。荆寶誰知光在璞。此池此石如有待。就流物理根昔夙。豪家園子假妝成。卷石不惜輦金鸞。太湖靈壁位置。

奇何如此石天然轟。先生之貞介如石。自謂此心池可掬。撫石臨流日賦詩。翳然作想甯濠濮。永嘉石門但在官。會亭禊事空馳逐。誰其題者林下人。墨光映水生紋縠。先生之樂樂未央。我欲爲先生歌淇澳。

食土行有序伯宗同作

崇禎丙子歲歉。徽爲甚。予在南都。休寧人有言。其鄉土可食者。貧民恃以生。問所起。則神指也。予疑之。今年丁丑正月。去予鄉數十里中。皆謂神開土倉。掘食者日以萬計。其土出凡數處。赤白異色。予取嘗。則固土也。因感而爲詩。

自古不聞天雨粟。歲饑依然米如玉。中原數載寇披猖。東南征輸日涇束。以茲下邑民嗷嗷。斗穀千錢猶未足。徽州有土茯苓色。云曰神授人爭食。通都聞之信疑半。予也攬塊增悽惻。豈知土亦出于鄉。白色壘壘如截肪。有時渥丹閒斑駁。要使負戴日踉蹌。東家老嫗先懸釜。西鄰幼子如搏蜚。共言不復泥滋味。食之不飢充稻粱。萬物生死皆以土。不信土可實腸腑。縱使大塊欲生人。何如五穀不禁取。草根糠粃豈有殊。緩死須臾土敢吐。嗚呼土倉土倉漫歌舞。不能以土輸官府。漢庭有詔賜蠲租。爲言更及食土苦。

悲安慶

嗚呼安慶與我隔一水。羣盜三年今兩止。前年潛山大湖破。今年刮地遭誅燬。石牌元旦一炬焦。練潭燈前齧橫倚。窮邨鉅鎮無完家。戟兒剖婦如羊豕。桐城斗大區區閒。懸焉不墜如卵累。賊強馬飽風雨疾。我兵不敢加一矢。陪京援師望不來。尙方依然賜督理。此時天子方宵衣。那知比戶縱橫死。置郡已近三百

年烟火不絕千餘里。詎今垣屋成邱墟。多壘四郊誰共恥。更聞楚賊來蹂躪。累然者皖將何底。即使郡國有龔黃。赤地枯骸那可起。嗚呼安慶可悲悲已矣。君住江南且莫喜。河北賊滅會有時。今日江南吾安恃。
非注。石牌。練潭。安慶地名。

與周仲馭

本朝空同死百年。文章寂寂生寒烟。後有王李爭氣象。名成亦與日月懸。邇來文士好輕薄。區區那必過前賢。公安竟陵亦已矣。耳食至今猶沸然。作詩斷自元和後。爲文不識黃初前。我友起家未三十。紅顏抗疏早歸田。一朝手攤千萬卷。茅峯掩關絕市塵。心悲大聖微言絕。要于理義費窮研。又嘉賈誼通國體。努力一掃風雲篇。新詩慷慨生哀歎。有時靜好亦娟娟。同時太倉張太史。下筆頃刻布蠅卷。華亭陳子工作賦。宣城沈生書翩翩。吾邑公幹有逸氣。吳門揚雄獨草元。吾曹兄弟尙六七。眼前窮達相後先。今者著作吾推爾。老成波瀾見大編。君不見功名富貴吾自有。丈夫要令千秋萬世書可傳。

非注。太倉張公溥。華亭陳公子龍。宣城沈公壽民。吳門楊公廷樞。吾邑公幹劉徵君城也。

讀少京兆徐公救鄭司寇下獄疏有感非注徐公石麟鄭公三俊

善人在患不及食。此語至今足三歎。今年鄭公忽下理。聞之令人摧心肝。丞相可以排閭闔。豈無畿業惠文冠。道途謹譁不可聽。乃有京兆呼雲端。叔向不信樂王鮒。慶忌頭血難湔汰。大臣榮辱關國體。區區豈必問交歡。君不見長安卿相多慎嘿。言者何爲不愛官。絳灌沮誼誼自哭。此道今人徒曼曼。

耕田苦

耕田苦。耕田苦。插秧三月今無雨。吳中水利半人工。十里九見翻車舞。一車灌田畝二三。一車用力人六五。水田高下不相及。置車銜接凡數部。盡日屛水水盈寸。南風復吹作乾土。戮力安知晝還夜。赤體相對子與父。下溼上炎背欲裂。前呼後和聲邪許。水非石鑽索非鋸。乃有轆轤生步武。東南歲輸四百萬。那知粒粒出脛股。桔槔幸有古人師。不然滿原成薄鹵。豈無梁肉厭厮養。豈無絲縞多商賈。牙檣錦纜何喧譁。調笙理瑟半僧馮。世閒萬事苦樂均。不信但有耕田苦。嗚呼耕田之苦難比數。有苦不聞動官府。中原鉏耰化爲兵。下邑催徵猶如虎。十日不雨可奈何。黍稷安能飭盞盞。作歌我亦操豚蹄。不及詩人美原隰。

大旱歌

丙子酷熱江河枯。父老皆云廿載無。今年不雨已三月。入秋赤日團平蕪。驕陽亢暴不可制。土龍天矯胡爲乎。十家農夫九家哭。長官坐嘆空躊躇。若使原田盡燬裂。東南歲額何能輸。只今帶甲滿天地。忍見民窮吏復呼。仰睇雲漢予太息。安得一夕倒天吳。不然移此于冬日。寒者可使長無襦。寒者可使長無襦。其如飢者食無歎。

涇上行贈顧子方

涇上者誰顧子方。眉閒將相氣蒼茫。讀書萬卷苦不足。新詩走筆風泱泱。招我六月出秋浦。長楊空堂相對語。酒酣夜半自起歎。不恨今人不見古。心嘉賈誼非腐儒。有組志在繫單于。生憎丞相身負國。折檻朱

遊殿上呼。以茲憑弔。感今世。寇燹中原。□□薊。豈無肉食謀者鄙。丈夫低頭猶角藝。家有黨名四十年。中間日月再迴天。元祐紹聖。何翻覆。吾道危如一髮牽。自傷致身苦不早。坐令擲揄伏滿道。大笑生乃與噲伍。箕乎幸爾有同好。土橋班荆語未終。虎阜高談生悲風。酬唱不知三歲近。心期直與萬古窮。長事袁絲弟仲孺。顧我敢謂雙棲雄。嗟我馬齒十年長。上書七次空鹵莽。虛名那能竝顧廚。眼前謂爾獨倔強。文章小道何足陳。伸毫拂紙含悲辛。會須從此棄柔翰。直驅霄漢爭嶙峋。君不見錫山道南已不朽。天地生人必有耦。且令大雅自君還。富貴其于爾何有。

悲茗溪

丈夫蓋棺論卽定。林甫章惇無百年。袁州四明俱已矣。太倉南樂今忽然。茗溪茗溪多悲風。四海何人肯貸公。南北烽烟猶不息。聖明日月政當空。賈董何嘗負經術。區區子衿胡不容。嗚呼茗溪多悲風。

陽羨歌爲陳其年維崧作

定生有子年十三。神明秀澈映秋潭。不知胸中何所似。下筆頃刻布雲嵐。我來十日九課藝。尺幅無多時異勢。步驟三日罄王良。撤席吾將避其銳。願爾讀遍世閒書。賦才不獨似相如。我聞義興多往傑。斬蛟伐虎聲烈烈。後有進士吳師古。慕義猶將疏草揭。卽如爾祖宮保公。歸來前後留高風。男兒生當學賢聖。况有文筆開鴻濛。我歌陽羨今贈爾。直羨爾父有是子。覓粟不生彭澤歎。明年已似我長矣。初筆欲擊驥出塵。嶄然頭角看嶙峋。君不見陽羨紆拖日滿市。爾曹豈是區區人。

漁隱圖爲陳青谿貞達水部題

青谿小草今復出。何爲先作漁隱圖。紫衣小艇坐秋水。釣竿直欲拂珊瑚。我聞義興富山水。淪漣碧色兩溪俱。顧君豈是真漁人。承明直造心江湖。展圖顧影時自笑。高堂波浪生菰蘆。青谿可向此中呼。我欲從之賦印須。只今帶甲滿天地。中流擊楫誰躊躇。安得澄清四海後。與君共釣南山隅。

丹陽道

曉發丹陽道。蝗蟲飛蔽天。暮宿句容邸。斗米錢半千。行坐皆聞人歎息。言之直使我心惻。富家無租要納糧。貧者勤耕不得食。近畿六邑盡蕭條。江北紅巾甲未銷。幾處無家寡婦哭。幾方征調官兵鬻。平曩聖人近召對。謬謬詞臣徒盡誨。河南矯發誰犯顏。淮西不聞身請載。願以所懷動至尊。眼前遮日浮雲昏。明朝驅車秣陵去。愁見寒原野外邨。

折檻行有序

南京成寶慈勇侍御。以言事被逮。友人周仲馭、陳定生、顧子方、梅朗三、麻孟璿、三衡、沈眉生、期予祖之京口。予遠不及赴。因作此。往老杜曾有此行也。

本朝列聖容直臣。未見臺省長批鱗。大禮大獄杖且死。郎部翰林爭嶙峋。居升旣戮張英盡。謬謬者誰如星辰。成公感事獨發憤。報國直當捐一身。杜陵小吏尙如此。况服獬豸甘逡巡。臨風爲謝諸君意。叩頭流血久無辛。

苦寒行

二十餘旬不見雨。遍地江湖成赭土。一朝風雪壓城頭。擁絮無能窺數武。臺榭紛然筆墨催。諸生踉蹌試大府。眼前見誰露頭角。嗟爾塗泥沒脛股。昨聞□□薄黃河。軍書斷絕一月過。應知士卒指盡墮。誰惜將軍雙鬢皤。北風直北無時息。寒似江南十倍多。即使江南無衣死。強如比屋死干戈。

方密之以智畫天柱峯圖相贈作此還答

我聞天柱之峯高百仞。虧蔽日月槩星辰。精靈下降有方子。筆力要與爭嶙峋。一朝作圖來贈我。意象髣髴含蒼旻。嗚呼方子何奇傑。世閒好事都精絕。學書直造王右軍。作詩欲與工部絜。棄爲小道云偶耳。我曹立身有大節。此時四海盡烟埃。鈎黨纔寬□□來。南京狐狸號不息。燕雲關塞已全摧。平羌無人朱遊死。誰能諤諤諍平臺。卻重君家有召虎。三湘七澤藉安堵。憐君表餌未能售。顧我何人假毛羽。卽今相遇市塵中。夜半酒酣共起舞。寫圖貺我何敢當。振衣者誰君在岡。安得從君排閭闔。手扶雲漢掃欃槍。不然挂此一幅日相對。愧我雖有素壁非高堂。

我來行贈侯朝宗方城

我來秦淮五月終。於時佳士已雲集。就中朝宗年最少。四海心知但一揖。文章詩賦無不工。下筆雷合風雨翕。三朝舊事久沈霾。爾復精心爲理輯。眼前闕茸何忍見。從風草靡誰獨立。畿南已作戎馬郊。江北蒿

萊滿郭邑。反書日達。司馬門丞相充耳。何能入。列位喑啞。道路目拱手。新參仰呼吸。吾皇神聖試共。鮮決隄。那知不可及。嗚呼朝宗何愚哉。李蔡爲人下中才。心肝勸莫學逢比。詞賦何必擬鄒枚。直須不聞天下事。拱嘿閒復雜談諧。如此低眉但數載。眼看富貴立崔嵬。君不見似我倔彊還如此。於鬚於鬚今復來。

無雞行有序

陳士樂宏緒自北來。爲予言。畿甫其未到州邑。卽郟落有雞者。皆自殺之。蓋官軍聞有雞聲處。必行抄掠。其暴甚也。故人家數百里無雞。陳時爲晉州守。所目見者。予感而作此。

陳生酒酣慷慨泣。爲言。□□□□。去年入督師。盧公已死。綏觀容高。監兵難緝。撫軍白谷號能師。所過猶然騷郭邑。□過猶可兵殺我。兵勢燎原烈於火。入室那知他人妻。掠衣何惜道傍贏。□去郟烟未盡墟。兵來十室九家播。有雞立撲不使聲。此聲不惡能致兵。幾州籬落寂停午。幾家板扉晨不明。可憐畿輔此僞後。數百里中絕吠鳴。晉州城外無雞啼。濟南城裏草萋萋。棘門霸上徒兒戲。將軍有令久不知。若使一人能辦此。何爲四海盡潢池。

任邱行有序

丁郎中耀遇□任邱。得不死。歸言其事。因作是行。

丁郎奉使至任邱。是時□馬風雨至。任令倉皇設城守。鄉宦一錢不肯出。須臾四野盡烽煙。□未薄城民已貳。可憐城陷肆焚掠。出入縱橫皆□類。官廨烟消一夕中。□□沈沈居甲第。金帛括土窮搜求。婦女比

屋恣淫戲。老弱誅死丁。壯械累累相牽同。起寐蛾眉口口不識羞。曉妝猶然施粉翠。口居侈然有主臣。會飲席地羅金器。有時會獵復一出。貂帽短衣從數騎。一口繫郎至口前。叱使屈膝郎裂背。問郎何人郎大言。五品任官今奉使。萬金買命無一錢。兵在其頸者數次。適有天幸郎不死。赤體開關備顛顛。歸來慷慨向我陳。口口能爲我自易。嗚呼任邱小邑何足哀。山東藩國已蒿萊。卽今口口已飽颺去。何道能令不復來。己已于公亦已矣。業陵小令安在哉。

誦經行

西方妙道超空色。福田利益涉難得。稍修其法了死生。假託往往藏奸慝。受戒嘗爲聚衆資。焚香偏使愚人惑。或言劫火當盡燒。或稱再降有彌勒。勝國昔年起無爲。豈知後來兆鼎革。近日山東來白蓮。掃除大費師武力。乃知作賊多誦經。未聞誦經可殺賊。督師楊公總六師。小醜何難滅朝食。不言兵法言佛法。亟請誦經奉詔敕。古人一言敵愾生。此舉豈不墜軍實。若使賊聞必大笑。空王何處行誅殛。臺諫那能痛哭爭。大臣吁嗟相閱嘿。予始聞言不敢信。及覽邸書增歎息。桑門從此九重開。鬼方何必三年克。嗚呼卽使誦經安反側。世閒豈有佛社稷。紙上空言尙如此。何況有骨來西域。君不見潮州刺史古錚錚。又不見龍場驛丞在正德。

楊枝歌有序

伎有某者。從人近三十年。夫死輒嫁勢家。其事可感也。所從者曾與予交。爲隱其名。作楊枝歌。

君莫癡。君莫癡。請君聽我歌楊枝。君上將軍莽自負。楊枝縷作金銀絲。解稱詩。工臨池。對人嘗恐不能知。來禽青李隨手帖。黃絹色絲絕妙辭。十五相從今四十。白頭偕老不須疑。豈知將軍一旦死。楊枝忽向他家垂。將軍自昔教歌舞。黃金珠玉寵嬌姿。今日楊枝飛絮去。華堂冷落如茅茨。五侯驕奢橫勢力。如花小婦夾塔墀。粗豪那識謝與衛。但嗤楊枝今已衰。楊枝嘿嘿不自得。今夕何夕比當時。侯家富貴吾何有。將軍恩愛空尋思。嗟楊枝。嗟楊枝。水性空勞不自持。未幾踏作路傍落。人生見此增感慨。手折柳條棄擲之。丈夫意氣有時盡。千金何必買蛾眉。

答贈余澹心懷

南京佳士如山積。誰攬雲霓手自擘。讀君文字嘆君詩。風神况在藐姑射。我居秋浦萬山中。一朝避亂浮家宅。虛名往往動都人。負郭猶然錯履舄。自傷潦倒風塵中。心知逢迎真無益。假館君隔離落閒。獨喜素心數晨夕。贈我七言覽未終。白日空中走霆霹。感我致身苦不早。知我多憂嘗腕搯。卽今詩格久茅靡。何幸得君掃巾幘。相期于我何有哉。將毋因此生羽翼。

雒陽行

神祖昔年建儲苦不早。于時言者棄官如輕草。東宮旣立王當封。誰云母愛者子抱。攬圖按籍狹魯衛。帝曰無如河南雒陽好。卽今堯仁睦九族。雒陽祭酒稱尊屬。几杖未聞賜吳楚。礪帶藉辭表郊鄆。豈知賊至山河崩。白頭老王遭慘毒。靈光一炬作烟消。黃金滿屋等秋漂。累累宦官屠羊豕。宮女如花逐絮飄。天下

聞之盡嗚邑。九廟震驚至尊泣。爲問闔外誰督師。丞相不聞請削級。朝臣痛哭那敢爭。腹大鞭長何能及。去年賊已敗興安。露布誇揚墨未乾。練餉已靡七百萬。中原郭邑十九殘。親王旣殺名藩陷。楊相猶能第一官。嗚呼多壘不聞大夫恥。舉國誰爲鬪伯比。屈瑕必敗請濟師。今之肉食謀者鄙。我悲雒陽悲未終。又聞楚客悲襄水。

襄陽行

昔之襄陽攻千日。平章猶然鬪蟋蟀。今之上相親視師。城破不及朝食時。瑤山前無匹馬。洊墮名藩誰爲者。要以虛言動至尊。禍遂罹于高帝之子孫。方命圯族敢逃誅。一死猶將肆矯誣。直使天下萬世之後。從此盡喪其廉隅。嗚呼武陵楊相誠可哀。忘親負國何愚哉。清漳有士尙未死。豈知身已委蒿萊。身委蒿萊亦已矣。襄雒二王何以相見于泉臺。

薄命辭

妾薄命。恃君寵。出身膏沐天下奉。裂繒不博一時歡。忍心白骨成邱隴。主恩旣重災亦深。紅顏掩面生悲恐。君不見武陵楊相公。顧盼猶然一世雄。高唐無復重相遇。五年富貴如飄風。妾薄命。負君恩。起自外庭承至尊。如山珠玉苦不足。人情已作波瀾翻。顏色未改君心變。黃金不負陌頭魂。君不見韓城薛閣老。一朝被逮身不保。當時自顧傾城笑。那知性命等秋草。

大雪五日矣。旅中卽事偶憶歐陽公會客詩。用其原韻。其序曰。玉月梨梅練絮白。舞鶴鶴銀等事。

皆請勿用

荒園枯枝未啓萼。寒風怒號勢相薄。三日雪下不肯休。四日五日復大作。開窗飄灑冒几席。瀰漫川原增寥廓。出門沒屐已及膝。炫眼光痕畏閃爍。當塗有友攜具來。轟飲直至燈花落。酒酣氣震各慷慨。陶然不異襲狐貉。仰窺蒼雷吹不斷。起看竹壓如搏攫。更深客散晨鐘鳴。但有空林喧飢雀。高臥不知午爨餘。令來相招畏躡躡。慰我旅况備苦嚴。我笑十年無此樂。何以解醒不須酒。松茗亟使敲冰淪。坐觀風濤狀滾滾。直覺天地冥漠漠。偶憶六一汝陰時。墮指猶能整矛槩。禁物敢望前賢工。詩成欲令後人噤。

歐陽詩體又次東坡韻

自注序云。歐陽公賦詩禁體物語。于艱難中特出奇麗。邇來四十年。莫有繼者。自蘇公至今。則又五百餘年矣。

空亭無人掃積葉。我來十日五日雪。寒風作威晝夜號。一朝瀰漫勢不絕。極望川原已失迷。低頭竹樹皆摧折。出門但覺人蹤稀。索米恆恐竈烟滅。已無高士能僵眠。幸有仙令餽不掣。客來攜壺共傾倒。更深翦燭還生纈。清歌紅袖欲迴風。高譚逆旅驚飛屑。爛醉那知街鼓沈。擁綿曙光驚一瞥。呼童炙硯爲題詩。歐蘇千載無人說。三寸不律最刻嚴。物狀誰敢犯冰鐵。

歐陽體又用東坡次子由韻自注序曰仍不用皓白潔素等字

晴陰何用灼靈龜。今日大雪前日知。寒雲起凍天地合。嚴風作勢晝夜吹。飄灑無聲先歷亂。少閒枯條如

染髭衡宇一夕變。規制江城四面無。流澌俯視坑谷平。凹曲仰睇窳堵失孤危。茫茫原野直冥漠。推窗細視鼻游絲。乃知造物真難量。此事豈關巧力爲。夾徑修竹垂欲折。亭亭終不借扶持。袁安倔彊自天性。那羨仙人姑射肌。攜壺顛倒仗朋友。擁爐擬物羞女兒。且喜入地螟螣死。占豐明年夏秋時。衝滑難擬幽人迹。經戶誰窺高士帷。但令閃戶嚼冷冽。虻然不改冰雪姿。一朝杲杲驚見睨。滿眼炫瞽光瀏漓。天半蛾眉邈難卽。當前濤勢生塔墀。萬戶埃塵承浣濯。建瓴直使草木披。屈指日歲行盡歸。騎還當帶溼馳。吹笙伐鼓吾何有。柏醕辛盤倒瓦卮。簡點詩篇禁體物。志與古人相追隨。千載歐蘇敢再遇。予也何人足繼之。

封侯行甲申

男兒封侯在戰力。此語令人增歎息。國亡主死將軍封。封侯何須見一賊。黃金有印大如斗。不殺賊奴亦相逼。嗚呼朝廷所貴非爵邑。區區意在安反側。君不見昔人手握天子璽。丞相如有驕主色。

大風行簡周仲馭獄中

南京九月大風起。木拔石走怒不已。太平門外谷夜號。元武湖水躍過几。豺狼滿市攫人肉。不知天變良有以。華陽先生整衣笑。秦岱崩前若無視。昔賢相戒莫爲善。區區豈必達元旨。萬年書見天日清。鳴琴聖人亦在理。

樓山堂集第二十四卷

詩

五言律

有感

誼策能答說。軍纓肯係胡。讀書嗟往事。懷抱愧吾徒。直北方傳燹。江東但索租。秀才僑。肸在。可漫老菰蘆。

邸中坐雨寄劉子城湖心寺

入郡一旬雨。盈街三尺泥。旅愁不可折。城雉若爲低。何處鐘聲遠。相聞湖水西。美人清夜坐。芳草自萋萋。

陶家山眺城外山水自注池州城內

高眺俯城平。千峯晚送清。不知春已去。欣見水方生。烟樹初無定。睥睨若有情。人家能幾點。歷歷遠光縈。

齋中夜雨同劉城得清字

入夏陰猶積。深齋雨夜生。寒風空碧落。虛氣轉幽清。爾我宜相對。塔除得此聲。情親兼旅寂。閑傍一燈明。

代愛妾換馬

紫塞忽聞秋。紅顏詎可酬。壯心君自遠。薄命妾何求。骨有千金好。恩無一夕留。願將憐主意。躑躅付驂騑。

村晚

龐公非就隱。謝子暫行山。
暝色隨秋澹。懽情對雨閒。
牛羊知日夕。漁釣隔溪還。
坐待前峯月。柴扉夜不關。

村曉

雞犬林初曙。藤蘿月尙殘。
青楓流翠溼。白露浸嵐寒。
漭蕩天如闕。微茫氣欲團。
所居秋自迴。拄頰試前看。

齋居非注在暫園東南數十武久廢

結屋到雲隈。雲深護碧苔。
一門千樹合。三逕萬山開。
天地觀常靜。詩書抱不迴。
曼聲長嘯處。朝爽若傾來。
不知人境遠。爲得鳥聲幽。
卻掃門雖設。欣看水自流。
雨消三伏暑。樹帶四時秋。
抱膝誰能識。悠然寄遠遊。
銘陋真成室。披帷乃有人。
潺湲鳴石髓。薜荔挺松身。
几亂風吹帙。苔疎月欲勻。
時令物自會。高咏入青旻。

出郭登湖山頂有雨勢自注山在池州西門外

山郭偏宜曉。盤旋得幾羣。
兩峯相澹遠。天地始氤氳。
積暑朝能散。平湖雨欲分。
因高閑指點。江影劍爲紋。

渡江自注往河南作

晚日晞初澹。霜風力漸微。
舟分南北易。帆認去來非。
一水流寒色。千山湧靜暉。
浮沈應暫爾。莫看鴈南飛。

七十里鋪

不到汝南路。那知江北塵。
計程七十里。共我二三人。
主客憐投店。風霜感駐輪。
相傾猶濁酒。莫漫說艱辛。

六安道中示王子非注王心睿

雪霽寒仍積。霜征興欲闌。莫因山邈迤。不信路艱難。漠漠蕭條意。行行近遠觀。前途猶共爾。相慰有加餐。
汝寧有念老母不覺恹然自注是日立春非注時王乾純先生爲汝寧

作客忽殘歲。違親况度年。慈帷依遠夢。官舍獨幽悵。未信勾萌動。方驚鼓角傳。天涯慙菽水。情切倍潸然。
除夕憶諸同好非注汝寧署中

數子傷離別。天涯念德鄰。臨卣方重客。王粲暫依人。對酒思當夜。新詩好近春。年華容易度。意氣遠爲親。
下第後泛舟赤石磯見石閒有鍾王題鐫因步其韻

水落流餘半。秋殘色未刪。偶來忘失意。到此卽深山。句使人親石。烟爲影結鬟。不知喧欲近。暝盡未能還。

友人泛舟至齊山

政在秋冬際。更宜山水閒。因舟得濟勝。觸石可開顏。攬眺情無極。蒼茫色帶殷。持杯口偶爾。新月待人還。

秋浦非注去城西南六七十里許

秋浦常秋色。秋殘色更深。爲疑烟是雨。不盡水生林。小艇如行鏡。長天可挂襟。與誰齊蕩漾。遲月幾迴吟。

酬內

三別徒懷玉。十年空上書。那知余骯髒。不盡爾欵欵。安石言相戲。仲卿氣口舒。他山猶覺遠。閨內得磁磻。

負郭

負郭深深巷。蓬門盡掩扉。那知人去遠。翻訝信來非。柳亂情無定。花飛意已微。刀環空見贈。心折未能歸。

舟過方山

江路方寥廓。河流又一航。水容生以曲。山勢總爲方。四面傾朝爽。千村抱夕陽。古今仍王氣。擊楫自滄浪。

十五夜月獨坐

月色四時有。良宵獨以秋。庭空誰與對。坐永自爲幽。萬里無雲氣。中天似水流。偶然驚竹影。零亂發清謳。

十六夜共子相諸從小飲

昨夜月如在今宵酒更宜。寒光杯自有。素影共爲持。匹練生千樹。空亭鑒一池。莫辭更欲盡。長此慰秋期。

宣城留別沈眉生壽民治先壽國兄弟

積雨動高林。留人意自深。二難誰可並。八詠到于今。燕市存軻。漸關中識布。心踏歌何處。斷欲別未成音。

應試南都伯宗祖別清溪

逐隊七千士。上書十二年。感懷唯我友。惜別更殷然。劍氣秣陵道。花期九月天。未知秋有色。溪水若流漣。

風阻荻港集楊子儀守備幕府清音亭

我以懷人至。風能贊客過。敢操吳趨曲。而聽郢中歌。白浪浮睥睨。清音遠薜蘿。酒長頻引劍。看爾洗天河。

白注。亭有洗天河處。

繁昌舊縣阻風

往來此舊縣。風雨獨今朝。江路因秋迴。歸愁以慣消。藏舟深藉柳。沽飲助觀濤。鄉客無端聚。呼同語寂寥。

九月十一日金山寺

天地此江心。浮沈自古今。波光湧出寺。雲氣變爲林。四面帆樯影。一叢鐘磬音。往來何足問。吾意獨高深。山自江中立。水周寺獨奇。不知曾擾攘。到此卽孤危。秋遠心生寂。觀高世盡卑。登臨如得數。四序總佳時。

虎邱

出郭紛相逐。尋山此獨幽。四周環聚水。百尺坦成邱。石磴平生照。林烟靜欲流。閑觀人自遠。不盡客吟秋。

半塘小飲沈聖符應瑞舟中同趙我完自新吳扶九

野水平輕岸。空明泝一船。林陰層入鑿。秋氣澹如淵。不盡琴書潤。相遭風水漣。棹歌何處發。杯酒亦同仙。

虎邱許孟宏王惠常見過信宿

涼風起山曲。二子意何深。到此同禪寂。登然喜足音。雨餘消暑氣。朋好助文心。何以生虛悟。鐘聲雲外沈。

遊澹石園同諸吳友分韻得奇字非注商山吳也休寧人

首夏陰常積。尋幽入谷宜。乍驚山欲合。蹶步路生歧。梵室開金爛。香龕鑿鐵奇。不知人境遠。觸石可增思。主人曾未問。徑掃若相期。慘澹知心苦。經營到眼奇。行廚穿竹盛。清籟接林移。雲族誰相造。遊絲淨酒卮。亭敞層巒曲。簷臨衆木卑。巡觴捐使令。品石喜參差。人靜觀常廓。躋高意戒夷。相看忘辨處。雲自變峯奇。

碧園非注在商山

何處遊頻好。藍園更碧園。竹涵秋四季。石照浪千翻。花氣消醇酒。林陰正映門。孟公知客意。風雨更煩喧。

與石居贈吳去塵 賦

谷口原留鄭。蘇門亦有登。徑幽松作使。意靜石爲朋。好事情偏劇。多能理自應。不因時中聖。誰識澹於僧。

至白下周仲馭以新詩書扇見寄

周子躬耕久。嚶求意不衰。照人猶古道。投我好新詩。白日入懷見。清音擲地知。淮南山固小。吾意在明時。

鎮江阻風登北固山

京口迷烟色。蒼蒼直一來。停舟不記日。力疾亦登臺。山勢如相待。江流去不回。秋心寄杳冥。極望使人哀。昔泊金山寺。今來北固山。登臨如咫尺。迂曲亦閒關。步散徐開抱。觀窮欲壯顏。偶忘風力勁。不盡樹潺湲。

遊西山

氣爽偏山曲。因舟濟勝宜。有峯皆笏插。無地不烟疑。宛轉誰營野。蒼茫我寓思。秋深天易冥。遲月一帆隨。

湖上逢馮水部給諫兄弟還朝予規以書受焉因復贈此非注馮公元颺元颺也

寥廓此湖中。相逢偶鉅公。善人能受盡。直道恥爲同。瓊固友生意。野王兄弟風。明時看努力。忘我獨飄蓬。

寄嚴印持調馭西湖兼問子岸渡

自昔風流在高居。靜若禪。曾蒙十日飲。尙缺一書傳。鶴喚秋誰問。鵝經老更妍。自注嚴工顏魯公書過庭應閣筆。魯殿可歸然。

高皇昔神武。和州初濟師。豈知壯哉縣。遂爾汙爲池。汝、潁、空連絡。江、淮、斷鼓鑿。殺人十五萬。莫使聖明知。
江浦

浦城猶未戰。遂有捷書聞。不築封京觀。先歌飲至助。死心甯士卒。生氣實將軍。寄語從戎者。皇恩尙可云。
范異羽先生雨中招聚鳴鳩亭得青字

何處可占星。鳴鳩聚此亭。林園不獻夏。風雨更爲青。有客爭能賦。如公恥獨醒。莫辭賢聖意。相對有沈冥。
來說

來說中朝事。鈎連復黨人。世情非反覆。吾道本艱辛。好士誰元禮。狂生幾正平。城門如入告。鞭撻豈威名。

聞口自注時方應試

聞說□□□。都城不解兵。邸抄三月斷。臣辱幾人明。戰氣方消索。文場費論評。七千君子士。誰不愧長纓。
己已冬閒事。言之氣尙吞。那知薪厝火。又見□當門。丙吉甯先識。平原敢復論。祇餘□□志。有淚注清尊。

出師自注南兵勤王

直北烽方舉。江東士本驕。主恩誰獨報。戰氣已非朝。卿子猶高會。秦師不禁囂。將軍肯受諫。莫漫且乘輶。
借問臨戎者。云能讀父書。可聞司馬法。曾慣習兵車。士鬪今知幾。軍行且自徐。誰當如蔦賈。先事已成歔。

題貢院壁自注三揚草策完以餘墨書之

自我低眉入。蹉跎二十年。臨文嗟戰螳。仰屋想飛鳶。意氣何堪此。功名况未然。徒憐軍抱足。起視月初圓。

聖主方憂口。諸君正第文。吾能言餌表。誰遂假風雲。鷹隼時思擊。驩驩本絕羣。不知長太息。天遠可曾聞。

張爾公自烈自燕中赴友人難還歸南京書來言有刪選之役非注友人袁公繼成也

寥落懷張子。衝寒自北還。善人曾解患。鈎黨正相關。對酒存卿漸。臨文憶尹班。王風今未萎。遲爾更爲刪。

嘉興聞信

莫問傳來信。言之意轉傷。壬人甯失算。聖主正當陽。日月霽如昨。烟雲過已茫。相持杯酒在。清夜若爲狂。偶憶先朝事。升沈理不殊。萬安終罷相。福達可逃誅。蕩蕩原無黨。悠悠恥學愚。斯民猶直道。莫謾悵楊朱。敢以通儒號。居然費論評。丈夫能慕義。聖世忍逃名。袁郭無朋友。裊融有弟兄。吟秋吾自笑。意氣向誰傾。

感事贈張天如溥虎邱非注時寓雪珥之竹亭予同在焉

寥廓相逢處。金閭氣正秋。誰疑吾道詘。偏繫客心愁。門夙高龍號。車甯避鳳謳。讒人天地窄。有北未堪投。自古論憂患。賢人受獨奇。上官空努力。孟博已殊時。著作當今盛。聲名付後知。吾家麟未絕。筆斷不須疑。

虎邱同仲馭眉生

天涯惟二子。作客偶同時。草木十年臭。烟雲一棹隨。素心留石照。高唱動林枝。不盡深秋色。清尊日夜持。

次韻仲馭將遊黃山留別虎邱

與君十日聚。山色往來中。對字權相接。論文愧未工。不圖黃海去。猶幸虎邱逢。搔首懷清夢。林聲夜夜同。

雨中過邱天民民瞻留飲同陳百史名夏陸履常坦用侵字韻

懷人方命棹。風雨動秋林。踏溼臨蓬戶。披帷對國琛。酒杯三逕客。漆室四人心。坐久忘深論。城頭暝色侵。
酬湯薦辛廷樾見贈

綠竹覆閑院。霜繁葉正摧。登然聞足喜。復此好詩來。白露宣懷抱。清尊注酒杯。知君龍劍在。拂拭爲誰開。
得梅惠連之煩書因送王在明都俞歸麻城並寄

梅子書來好。王生見復奇。論交還後笑。因別寄相思。張楚功當並。遊吳道不疑。將毋對杯酒。贈策笑江湄。
留別陳百史西巖非注在竹亭之西

與子相逢日。吳門秋已淒。紵衣獨未獻。雲石共曾題。射瀆楓村暗。孤帆霜日迷。同持尊酒意。深論在巖西。
五十日作客。一千里爲朋。論高非動俗。意澹已宜僧。爾我悲風雅。文章恃降升。相期還瀨浦。書札墜雲層。
夜飲楊維斗兼言別

楊子談經處。頻來醉酒深。共將文字飲。宜此歲寒心。我以遊爲寄。君應道自欽。詰朝回看處。惆悵動陰森。
舟夏

入暑經三伏。舟居已半過。晴陰忘月日。寤寐狎風波。泊港蘆容膝。聞聲櫓和歌。江天南北迴。飄蕩欲如何。
有懷仲馭

久客懷吾友。天涯更幾人。忠曾犯明主。意獨軫斯民。梅尉逃門卒。陶潛漚葛巾。安時多著述。莫漫擬沈淪。
定生見訪子方家

客裏秋風起。荆溪短棹開。以茲思呂駕。復共醉融杯。二子真難並。三人不速來。空庭當永夕。相視各于鬚。

定生以沈眉生疏草相示

索米長安市。羞稱待詔臣。懷忠必我友。羈旅直批鱗。賈誼真先輩。羅倫恐後身。臨風同一讀。相對語艱辛。

楊中翰招遊錫山

爛醉惠山酒。清心第二泉。楊修今好客。習郁又移園。亭蔭藤花亂。池風荇藻牽。雲根時倚徙。新月待娟娟。

陳水部園亭

何處逢齋瑟。高亭秋已疎。一園涵岱華。三徑隱河渠。檻曲香生遠。林深月到虛。從容忘主客。敢謂卽蘧廬。泉石隨人勝。經營以地宜。元方原有弟。水部况能詩。過客誰題字。忘機但酒卮。烟青看葉下。不盡照生時。此地林塘遍。居然小一都。賜書雲滿屋。築野意爲區。移自愚公谷。遊堪宗子圖。何當穿竹裏。深夜盛行廚。

南岳別墅爲吳問卿作

谷有延陵墅。蕭條秋更清。我來不問主。勝地久知名。萬竹青雲覆。雙溪匹練明。潺湲聽未絕。石髓澗邊烹。名節存三世。東南第一園。屋從林杪出。石自檻中蹲。曲曲香生徑。枝枝月到軒。不因培護遠。誰識挺雲根。自注。問卿祖父爲安節。徹如兩先生。

八月十五夜與定生看月南岳

佳月隨時有。良朋似子無。愛山同此靜。命酒不知孤。竹密清生籟。松將影入圖。寂然何所語。相對意爲輸。

住南岳三日矣十七夜吳問卿復移具看月再用前韻

月出疑前夕山光乍有無人原安寂歷景自助幽孤對此一庭色猶堪三笑圖客來忘信信知復爲君輸
次韻留別定生

爾以札爲友予慙蔡授書深交原自淡談菘直爲餘黯矣池塘碧蕭然柳色疎丹陽秋滿路清夢欲何如
贈劉幼濟廷鑿

探辛吾豈敢問字爾何求譜以齊名重交因累世留庭趨原二仲姓著自三劉年少今誰勝爭先是上流
臘月八日同劉輿父廷鑿過相公墩因觀所作新堤

不到湖墩久今來問水潯天空餘野色僧伴只疎林爲有登臨暫因知歲月侵與君同憶昔鐘磬杳然深
平湖真浩淼水落但遺墩荒寂今爲甚瀟湘意尙存天吳誰倒使地肺可孤鶩萬鍾工方具波瀾勢已吞
成都張紫城槩垣先生貽書及詩卻寄張前令予貴池

懷我張夫子棠陰久繫思猶留秋浦玉况足浣花詩出處原非偶安危視所持彭宣今未老獨許後堂期
得眉生孟璿朗三書卻寄時眉生以抗疏歸不復就試

良書來故友發讀意悽然共負求聲意誰傳招隱篇馳驅須並駕出處景前賢我亦浮沈久躬耕笑未堅
南京寓鄒滿字典閣子非注在金陵柵子時同寓

我亦耽幽者都城問索居許多高士竹甯卻故人車野色來千雉清音隱一廬觸蠻吾自笑蓬蘚可逃虛

閣自林梢出。蒼茫雨更宜。到門猶水泊。極目盡烟疑。客有王猷好。人原鄒子吹。牆東如可借。或恐遂棲遲。

訪伯宗靈谷寺

出郭雲烟杳。林窮徑轉通。山餘不盡勢。谷有自來風。王氣留松柏。深心倚磬鐘。茫然知復喜。許我亦從容。

過周仲馭萬松菴

遐情惟我友。暫止亦禪林。爲有生徒樂。能增道義心。陶陶沈月魄。謾謾坐風吟。不是攢眉客。相尋意獨深。

城南舟中 非注在聚寶門外

自我來京國。蓬門履烏盈。未能齊得失。而苦學逢迎。悅性無如水。忘機敢避名。依然城郭近。徒賦濯纓清。前月秦淮夜。深懷數子俱。情猶狎寤寐。事偶學江湖。挾策徒工瑟。求官未棄繻。海鷗知不下。秋色隱菰蘆。
自注。數子爲定生。子方。辟疆。密之。朝宗也。

棲霞寺

一帶城南色。烟雲傍小舟。洲分白鷺古。樹入赤磯秋。上下隨波去。東西視蔭留。鷗夷吾曷敢。或恐遂沈浮。七次書空上。今來水作鄰。羽慙鵬鷲滿。情覺鳥魚親。直北烽方舉。京南士用賓。吾儕誰共濟。擊楫待江濱。
覽勝最秋宜。空山更發姿。石身天變化。林色月參差。探藥非吾事。扶筇且自隨。六朝雲外蹟。草際臥豐碑。

送傅元之如圭應薦北上

送爾燕臺去。忘予失路悲。那知千里別。不盡寸心期。言事羞徐樂。和歌憶漸離。明年春有信。惆悵問南枝。

酬別李叔則楷西歸

意氣許誰重。惟君念友生。詩猶言北地。家偶寄南京。月浸淮亭影。楓摧江岸聲。不堪聞鴈渡。萬里恨宵征。

卽事

春官首舉士。藉藉語都門。遇合今尤異。文章道未尊。可知緣鄭五。上第詎公孫。寂寞三千士。飛揚敢復論。聖主臨軒試。諸生破格升。風雲真不偶。口舌自誰騰。未便俳優畜。還來侍從稱。豈無懷國士。容易受殊恩。

自注。時新第者。遽有翰林臺省之擢。王師今報捷。賊已敗興安。逋寇何能熾。天威久未殫。願言滅朝食。然後築京觀。文筆知誰健。淮西石可刊。

自注。督師報破賊于瑀瑤山。論者皆疑不實。

中使頻年出。高牙一日收。卽看諸節鎮。仍繫大長秋。壁壘觀應改。衣冠氣欲遄。窮天知主德。扶杖滿郊疇。天子重憂邊。中樞若置傳。誰知大司馬。度越漢諸賢。二說言猶爾。千秋事偶然。自注。用田千秋事。無方惟聖祖。今昔語同年。

寄侯朝宗

送子北歸日。江湖淚泫然。草滋今歲碧。月憶去秋圓。家宅吾如寄。烽烟幾處傳。何當高李輩。詞賦競梁園。

柬顧子方

別子蕭條甚。春風柳已絲。猶然前歲月。獨炤惠山時。世盡聲相逐。誰當道自持。片帆東下日。許我共驅馳。

答劉浣松明遇

寥落劉明府。猶然諸士風。友聲勞寤寐。被服獨從容。白下聲相倚。浣溪調復工。看君珠玉擲。忘我獨飄蓬。

賈家園同梅惠連

最憐春暮色。落日貯晴雲。以此荒園廓。能消近市紛。行廚穿竹至。高坐接簷分。共是羈棲客。情親獨有君。

送涂德公南吉兼問黃石齋道周先生

昔日陪京裏。因風識次公。十年懷寤寐。九死說從容。獄急疑朱建。名高得孔融。關西豪傑盡。曾否許江東。

郡邸除前一日伯宗餽酒時予將欲移家

作客忽云暮。唯君意獨親。萬方悲戰伐。吾輩感風塵。衡宇求相望。盤飧愧屢陳。明朝容易度。莫訝歲華新。

四日同伯宗公儼與父子相過相公墩

湖心嘗寂寞。喜過必吾曹。此日能乘興。逢僧卽遠囂。晴吹生戶牖。積雪隱林皋。爲讀十年咏。題詩愧綵毫。

自注。予十年以來。題詩此處者最多。

我友相尋至。春風生野烟。未知能免俗。不是愛逃禪。寥廓須身歷。波濤想目前。因談夙昔事。興廢欲潛然。

自注。夏月則湖水盈漫。

一墩通寤寐。廿載狎招尋。不記登臨數。甯知歲月侵。瓜茶捐禮俗。鐘磬盍朋簪。翻笑攢眉客。何能損道心。

寄懷大司寇鄭辛嶽先生

自與鄭公別。三年又復過。履聲留蹀躞。詩詠想磋磨。道以成功退。憂因感事多。將毋念牧叟。空抱切雲峨。海內論前輩。如公更幾人。四朝名節在。三選物華新。入夢慙多壘。逢荒笑賀貧。有心吳季札。觀樂向誰陳。送方爾止文赴安廬蔡憲副之招

北望

北望悲燕薊。多憂敗至仁。風霾天有意。河竭地無津。死者量如國。人猶火置薪。詩書難可信。雲漢嘆遺民。自注。祈穀日風變。天地爲冥。而運河適枯渴。

聞說雒藩破。敷天淚可彈。人咸思厚澤。世不幸多艱。上相言猶誕。中樞位獨安。羣公何寂寞。能不付長歎。聖主真堯舜。憂時試鯨鱸。不因恩浩蕩。那識技蹒跚。隼射誰能用。妖氛未可殫。敢疑世喪道。天祚炙人肝。河北人相食。江東米若珠。邸抄一月斷。烽火四方俱。泛宅難言智。移山敢學愚。傷心天下事。身獨寄菰蘆。江寧鎮旅舍與鮑曼殊論詩

近事示姪子相

殘冬投野店。况復感秋吟。濁酒寒燈夜。高山流水心。相輕原自古。大雅到于今。明遠知還在。忘予感歎深。近事傳何限。悲來喜亦因。方興占白水。未滅恨紅巾。司隸儀思漢。先生恥帝秦。敢憐奇偉號。葵藿抱江濱。否泰何曾定。元黃又復爭。晉臣心不競。漢相氣先盈。我亦生三戶。誰能復二京。未知同穴鬪。便可望昇平。

誰道江南樂。難瞻薊北庭。山河非故國。涕淚杳新亭。爲見除書目。殊多帶礪銘。毋令逃海士。不處小朝廷。主死難爲利。天功未可貪。何人謀曲突。各自冒朝簪。猶憚延年奏。誰懷建武慙。于今偏寂寂。雀燕喜東南。羣盜聞西走。強口又北屯。烽烟連朔漠。風雨泣陵園。難用如回紇。知兵必柳渾。羣公矜勝算。吾意折雍門。爲數中興業。還須簡易風。君臣曾握手。將相必和衷。陸賈徒工策。宋昌已第功。雲閒唯我友。封事意能同。

郡中示輿父

八月來居邑。秋風已颯然。卽深宗國恨。恥附渡江賢。似子猶承學。嘲余亦守辛。東臬收未熟。相歎不逢年。

贈咎無疑 質

太邱獄可待。朱建跡難明。不信寬鉤黨。誰猶仗友生。關西傑已盡。江左子知名。無數風塵色。淒涼滿帝京。

蕪湖別吳起之元來時爲其兄和受甘來給諫請卹歸

水落江流寂。皋亭葉下紛。帆歸差陣鴈。飲別寄停雲。抗節猶難弟。懷憂有舊君。天涯存縞紵。惆悵掉頭分。

贈體中通和上人用彭禹峯而述韻

非注體中後。以同樓山兄先生起義沒于陣。非爲之立傳。彭鄧州人。時避亂于汝業里。

吾逆本艱辛。相逢體上人。林開翻貝葉。谿絕問花津。入社真多事。逃禪亦有鄰。至今圖繪在。三笑爲誰陳。

莫道

莫道南京事。臨風淚欲絲。東宮推邱獄。故劍棄微時。采女須千數。酬星可一卮。滿朝甘載溺。天曠豈能支。

前星杳渺事。日月蔽精英。抗義靖南疏。興師左鎮兵。誰云爭順逆。遂以出降迎。自古江東恨。無如此日并。
自注。靖南侯黃得功。上疏爭東宮。平賊鎮。舉兵以此爲名。

屈指今五月。垂衣僅一年。難追航海事。方撰福華篇。自昔論成敗。所居視佞賢。可憐天塹狹。佳麗盡裘氈。
閑看處堂喜。真稱舉國狂。人猶殺李范。運不及齊梁。寂寞臨春閣。悲涼石子岡。只餘諸葛恨。頭血濺淮揚。
自注。猶殺周仲馭。雷介公。而史道鄰死揚州。

爲歎興亡易。居然似贈攜。沙邱疑射股。郿塢定然臍。悵望鍾陵色。蕭條蕪水西。赭山雖突兀。難可擬靡笄。
近事最悲辛。吞聲未可陳。皇圖數百載。輕擲兩三人。末世多王謝。空言亦遠巡。吾生雖寂寂。心睇大江濱。
課童子理蔬圃

居本絕城市。性復愛田園。有奴勤作力。相對但忘言。肉食效已覩。畦蔬意自存。何方終學圃。兵警到前村。
瓜架

每念青門事。方驚白下聞。國家猶置弈。名利總浮雲。擾擾風塵隔。垂垂籬落分。衡茆宜對此。散髮坐斜曛。
又題泥灣壁 非注在城南九十里

離亂到于今。江南又陸沈。各懷家國恨。不變死生心。好整偏能奮。提戈亦解吟。他年銘勒事。一笑此亭陰。
非注。在城南九十里。尋有從泥灣寄家人永訣書。集中不載。非編入仁至錄。

樓山堂集第二十五卷

詩

七言律

杉山寺

杉山山寺萬山開。夢裏曾經幾度來。雲外僧居天外寺。雨中花散石中臺。茗香此日同清聲。詩句他年照綠苔。不索空門煩惱宿。誰令身世絕塵埃。

重陽風雨飲伯宗藜亭

劉家亭子屋之隅。風雨開樽意獨殊。已羨花時羞獨醉。還同竹裏盛行廚。青天蕩莽傾簷至。黃葉蕭疎喜客俱。亦解閉門佳節度。長房何用更囊萸。

明日同諸子飲丁介之煙齋中次韻

虛堂爽氣入深秋。溼滿尊前翠欲浮。已辦乾坤開醉眼。卻憐風雨接城頭。佳時若爲宜人住。高會應能散客愁。潦倒不知更欲盡。籬花山色任悠悠。

丁太史亭成

高居迴絕紫霄閒。別啟林亭離市閭。城上翠微通遠色。湖頭練影自成斑。鴻苞黃石誰兼器。碧樹青蘿好
壑閑。亦解避喧非避世。誰云心隱是東山。

五日觀伎賦得紅囊妒殺石榴花

數幅細紋翦絳紗。輕雲一片綰明霞。不應微出凌波步。那信爭看滿樹花。馬上透開千疊皺。帶中原佩七
還砂。早知絕豔欺凡種。誰使安南載漢槎。

聞□□有感

拊髀深宮久繫思。遼西征戍十年遲。甘泉此日傳烽近。畫閣何人肖貌宜。秦世至今迷鹿馬。周郊無士應
熊羆。可憐四海和同甚。謀國曾稱警朕師。
一從宦寺任疆場。賜劍年年說尙方。天上出車非召虎。人間誦德盡金璫。敢云下策徒三表。未許乘機似
五王。極目搶攘何日息。深山不禁意如狂。

練潭自注在桐城

霜含斜日影相參。別有幽光護練潭。指顧平沙天欲鑿。依稀遙嶽氣成嵐。迴環林薄知前徑。入望薨稠可
脫驂。野店偶忘身在客。卻疑風物是江南。

同王公儼兄弟宿雨梅心驛

風沙吹合晝常陰。寒雨橫窗入暮深。客夢一身隨遠路。旅情十日動微吟。尊前醉舞消簷滴。夜半茶聲續

漏沈何處天涯非逆宿。對牀贏得此梅心。

淮肥

古道驅車路欲賒。川原晴色淨風沙。雪殘影散山山曲。霞落光含樹樹舒。天入遠空無地接。望回鄉國有烟遮。循谿不解穿林出。笑指茅簷日已斜。

自亳州道中至固始境上

路穿磽确幾山盤。三日危勞漸覺安。天盡楚江微有色。雲連汝水似爲瀾。馬蹄蹀躞消餘靄。鴈磧依稀動晚寒。疎樹碧紗帘隱處。投居欲作故鄉看。

光州公廡有林亭竹石吳使君留飲移日

風雨連途此暫閑。公庭亦復有林閒。旅中看竹如逢故。花裏銜杯且破顏。酒自引人行勝地。亭如留客坐深山。城頭暝色垂垂落。無數黃雲點石斑。

蠟梅自注王汝寧衙舍

客盡冬殘未見梅。巡簷忽喜此花開。寒香不妒秋籬早。冷豔曾驚睡蝶來。魂夢只須依夜月。飄零莫認護蒼苔。枝枝欲向人前語。贏得閒亭官舍栽。觀闌有詩應未到。憑郵欲折認會非。生來不識東風恨。坐對還須暮雪圍。解瓣暈同驛客醉。垂枝痕帶美人肥。明朝已報迎春早。臘盡芳名忍未歸。

汝寧詠雪 用蘇長公韻

昨夜寒風落玉纖。肅清如凜使君嚴。夜爐蒸盡詩無草。冷夢思回水著鹽。梁客篇章曾競色。吳門練馬共攢簷。亭前百尺雲鬟媿。指點谿訝萬筍尖。
銀海翻波影沒鴉。載來鮫素幾千車。虛疑瓦竄仙人鼠。好事茗烹玉女花。絕塞使臣氈護節。空山高士臥爲家。請看一夜梅零亂。強賭珊瑚萬萬叉。

李達自燕中歸傳滕陽驛方李兩御史就逮題壁詩讀之愴然李感和二首因步其韻 自注方訣

子李思親

讀爾新詩倍愴情。舊年聞詔已吞聲。豈知御史鷹鷂志。化作郵亭風雨鳴。豺道秖今羞赤轂。牛衣自古笑輕生。浪從草野揮雙淚。焚硯窗前又未成。
申徒免論自超然。喬固何慚日月懸。感事和詩惟好友。過亭題壁共三賢。因思厲夜空求火。莫以傷莪可廢篇。自古平時皆蜀道。此身無那未逃禪。

聞報

聞說真人自代來。七年日月幸重開。趙高已失秦廷馬。董卓難封郿塢財。四海衣冠新沐浴。三台象緯久塵埃。獨憐文似無人薦。長笑山中暫酒杯。
滿地冠裳共祝年。嵩呼猶幸未盈千。那知殿角曾三震。遂有龍飛自九淵。錫土羣兒徒自貴。敝衣乞賜可

能穿眼前翻覆應先識。穀有朱丹實可憐。

自注。往劉瑾下獄。乞舊衣遮體。時有稱魏九千歲者。

九月十一日生辰

嗟我虛生忽此辰。每逢初度感風塵。十年青眼交惟友。九日黃花意向親。任俠季心終以氣。長歌原憲不羞貧。明時痛哭真多事。抱膝如今實幾人。

示緒倩子相

春深花發氣如曠。鳥亦嚶鳴喜得羣。至願有三山水友。絕人無一字詩文。浩歌何處彈長劍。奇服空能冠切雲。敢謂火攻猶下策。年華容易愧諸君。

邸中夜雨讀詹劉二子文 自注詹振劉城

河外寒烟日夜薰。城頭暝色接簷分。不嫌作客三更雨。爲讀空羣二子文。燈影淨開秋水練。庭聲滴碎翠微雲。旅懷似病憑誰發。濤勢還從枕上聞。

旅夜看犀軸傳奇是沈青霞鍊事末句深有感于聞氏

生平愛說沈青霞。孤憤長鳴一劍斜。旅夜無聊翻雜劇。逢場作戲豈虛誇。偶然燈火窺雙淚。爲與悲歌和一笳。若使史遷重載筆。肯將女子後朱家。

九月寄諸從應試

兄弟登高少幾人。爲憐晴色亦艱辛。三秋蝸角猶爭戰。七子延州絕比倫。入夢可知懷小謝。並龍今復見諸荀。湖墩齊麓應蕭瑟。補笑參軍定此辰。

非注。筍、簞、筵、履嘉。廷幹、遇、七子也。

湖上書懷 正月二十九日非注池州作

湖上相從十四年。每來秋色與春妍。大觀宵冥潮浮閣。高興夷猶棹遠天。憶與一公交世外。至今雙樹植庭前。可憐青鬢長如此。爲聽鐘聲發曉眠。自注。一公指諦公也。

吳孟醇希孟見過

輕風野外散氤氳。湖上蒼茫色未分。我自水鄉求悅性。那能僧舍學雕文。有聲黃鳥猶呼友。何意青蓮政似君。爲少遠公同一嘯。曾無閑卻度谿雲。

三山舟晚遇風 九月初三日

暝色空江首自搔。西風濁浪拍船篙。三山似與流俱去。雙槳平隨岸影高。幾度秋殘悲木葉。慣從日落駭波濤。長蘆淺港深深泊。旅夜徒驚夢裏勞。

虎邱社集

驚看象緯動禪林。名士東南此盍簪。金谷蘭亭詩酒氣。紵衣縞帶結交心。投羊若水堪羞古。成市華陰偶見今。歷國未如吳季札。天涯鄰德敢浮沈。

閩門舟中華亭二杜駿徵麈徵集朱宗遠灝周勒卣立勛楊維斗廷樞張草臣澤朱雲子隗李仲
木槽陳臥子子龍張友鴻一鶴吳扶九翻沈聖符應瑞彭燕又賓諸子

月滿高城酒泊航。雲閒寶炬耀金閨。弟兄袁灌。欣同俠少。長機雲狎。主觴角技。數公同戲洛。壯遊千里不齋糧。明時敢號高陽侶。贏得沿洄夜未央。

杭州諸子集同李源常憲西湖共泛十月初四日

十月湖光欲盡秋。相逢良友共相求。一船酒載仙呼客。兩岸人同鏡裏遊。菱杪穀紋風自送。柳梢黛色月能留。滄浪有曲君休聽。未信晴波可狎鷗。

憶劉伯宗父子

舟行念爾肅深居。積葉空階著幾書。二劉姓字偏驚俗。一代文章敢側余。梁月窺人疑有夢。秋風歸興不因魚。蟹肥酒熟知誰對。肯令趨庭日夕虛。

寄諸從

延陵七子舊知名。秋色偏憐旅客情。九日登高應共念。三都著筆問誰成。印須好友俱難弟。到處逢人說勝兄。名士東南吾已盡。歸來尊酒細相評。

楊龍友文聽集雨花臺甘露閣

城南九月盡秋妍。客裏招攜九日前。西蜀校書能壓坐。山陰名士半通禪。青天木末雲開幃。古寺花閒雨

作泉莫以更深頻翦燭。心期常共塔燈懸。

寓程去聞喜吳時可至

谷口春雲杳鶴思。何當高屋許棲遲。登堂周子欣親在。對宇龐公率爾宜。初見鏗然生遠韻。深譚不禁半憂時。古今懷抱尋常事。雅道無須兩命兒。

贈吳子舍去非兄弟

曾從聲聞許交權。相見頽然僅勝冠。敢謂仲來開有徑。卻疑方病自爲難。人生國族心偏遠。客到高園夏亦寒。積雨如山忘旅切。看君文思若興瀾。

邱園非注在商山

四月桐陰影欲流。草堂客聚盡清悠。素心周閱非緣飲。消夏林亭卻勝秋。碁局靜談隨手置。鐘聲閒接隔鄰幽。一時名士山陰侶。姓字何須禊事留。

將去吳門方密之贈詩書扇答此

去歲相逢盡賦秋。悲君明月暗中投。可堪擊筑常燕市。爲復呼仙舊酒樓。縞帶紵衣行次有。來禽青李握中留。孤帆遙指隨天闊。心折江聲日夜流。

宜興訪陳定生

西風放棹大江南。秋色蕭疎到可探。我以懷人周水國。君應謝客拾山嵐。荆溪明月勤生夢。虎阜閒雲待

稅騶世路卽今成反覆。菰中能得幾朋簪。

九日項氏兄弟集同朱雲子錢吉士禱朱望子陵遊上方山至山足遊人萬衆舟不能進夜月反

棹雲子趣予共作

佳時從俗到人閒。此日追隨也自閑。大野誰知花寂寞。疎林不盡景幽艱。千帆遙月能消酒。幾客還舟未到山。好事與君同句就。古來嘲笑代爲刪。

與雲子吉士泛舟橫塘過君和宅未登

秋深野色靜相尋。舟過橫塘氣已森。杯酒籬花山水國。文章朋友弟兄心。褰裳慚愧龐公宅。抱膝高稱梁甫吟。試問同來今二仲。可曾時月共登臨。

寄懷張天如

秋風婁上憶張衡。京國東西賦可成。敢讓羣儒紛虎觀。暫施絳帳集鸞聲。三年顏色時窺夢。九月魚書未報瓊。似我旅遊寥闊甚。自慙筆札受虛名。

宿靈隱同舒芭孫沈崑銅吳時可羽吉分之字

遊山夢久到山遲。情勝于今一共之。竹下尋僧方日落。澗西覓路到烟疑。自然石勢飛來似。不盡霜林看後差。紅樹白雲隨俗好。聞鐘何用獨攢眉。

澗西

竹林窈窕徑通幽。接竹爲溝水倒流。僧視萬峯藏几席。人來十月際冬秋。雲嵐冥冥尋常事。江海微茫最上頭。發光嶺昨夜湖中聽歌舞。心從此地觸虛舟。

飛來峯

海嶠何年飛未還。奇峯流落到人間。生憎佛鑿傷天巧。猶喜楓多點石斑。紅樹遠連施絳幘。晚烟低結亂青鬟。那知五嶽交胸抱。到此偏憐世外山。

春興

十載秦川走鋌多。封狐一夕渡黃河。青天風雨驚吹角。赤地波濤斷洗戈。何處有龔馴渤海。空嗟無詔令朝歌。可憐耒耜生刀戟。引首樓槍可奈何。

人間賣卜豈王郎。節制何人控鳳陽。灞上將軍驕駕鶴。長陵烽燹泣亡羊。千年王氣猶鍾漢。一炬桑田已變滄。近讀詔書深罪己。牽纓空拭淚如滂。

廬江郭道已成塵。舒六桐潛失所親。原野縱橫彌白骨。乾坤慘澹半黃巾。戟嬰刳妊悲三邑。弔死扶喪過一春。我亦山中風雨夜。側身不禁意艱辛。

津吏沿江日夜催。白門飛遞督戎牌。已知邑屋無烟火。猶駕樓船暫酒杯。一月聲援矜迅速。三旬賊去故徘徊。渡師枕上空聞昔。誰道官兵甚賊來。

蘇州開府擁嚴師。千里舳艫蔽水湄。莫漫有烏占楚幙。誰云健鬪屬吳兒。魚龍舟楫偵頻斷。草木旌旄嘆

亦疑朝上捷書鄰夕壑。中原何怪盡潢池。
繡衣持斧肅秋霜。柱後冠疑短後裝。屬有長江限皖國。不然無地縮池陽。烏臺計慮先薪木。雀舫追隨作
戰場。共道好官民餉賊。負戈何以氣飛揚。
備兵使者建高牙。十載江南吏是家。三窟但工江上下。二毛敢問賊參差。羽書深幸無逢口。鼓角嚴聲早
散衙。何事干戈妨宦達。爭如肉食老京華。
江城三月盡啼鶯。忍聽傳呼亂癸庚。但問金錢到厨養。何曾玉貌說先生。廣文寄帑爭先識。公子乘船好
避兵。北望烟塵何日息。已知皇路礙躬耕。

答江夏劉濟甫數仁

我昔觀詩嘆楚風。君今有句秀寰中。自來逸氣推公幹。敢謂知名到孔融。烽火歲連書未斷。芙蓉江隔意
常通。隆中莫漫閑相許。獨恐淮南桂已叢。

寓梅里贈劉輿父非注今爲一喝菴

幾度來遊幾寓居。春風窈窕况花初。殷勤不用先縣榻。卽次何能暫授書。多壘四方慙獨爾。高樓百尺敢
誇予。聖明宵旰須才急。應見飛揚誦子虛。

寄仲馭茅山

春雲天外感飛鴻。念爾茆峯定幾同。豈羨入山稱宰相。卻憐學道本英雄。三年馴鹿藏蕉夢。九死披鱗付

塞翁側席近聞明主詔。可曾國士問江東。

東陳臥子

遠懷天際誦辛文。湖海名高自不羣。大雅幾人能更作。雲閒今復得如君。綢繆河上憐同調。奇偉菰中敢獨分。命駕已慚秋欲近。翠微搔絕大江雲。

寄萬茂先時華陳士業宏緒

寥落秋雲江上孤。猶然僑胙滯菰蘆。楚人未得城酬玉。鮫客空揮淚是珠。待詔近聞推賈誼。著書曾否學潛夫。同時我欲墻東去。不是疎狂號酒徒。

南太宰鄭辛嶽先生請告不得暫歸里中時將赴內召因贈

黃髮清朝近已稀。主恩偏惜老臣歸。久疑八座留南國。未見三台變少微。天意已知憂聖世。蒼生不願說先幾。卽今言事多徐樂。應笑違時獨布衣。

丁丑元旦

聖主垂衣正十年。陽回玉歷慶同天。遙瞻象緯皆環極。敢謂文明尙在田。此日春秋書有食。何人災異據師傳。只今白虎紛綸甚。應訝揚雄獨守元。

莫以明時感歲華。優閑直復羨農家。尊前獨酌頻浮柏。道上公車等戰蝸。羣盜東西方擄掠。甘陵南北可萌芽。憑誰解盡陽春憾。屋後寒梅已放花。

羅季先尙甲載酒招伎自五雲菴至齊山同劉伯宗王公儼

出郭青蕪十里鋪。林烟深處好攜壺。一時良友皆情勝。五月登高興不孤。紅粉可知香積意。白雲長爲翠微圖。遊山歲歲疑山路。著屐相扶日已晡。

首夏尋山山更青。因于巖壑失朱明。幾多滅沒碑題斷。到處谿谿石勢迎。感慨已忘遊跡遍。蒼茫猶見髻雲輕。也知眺覽情何極。相送長堤柳色傾。

答姚雨若見贈

丹山秋色酒浮黃。客裏銜杯盡辟疆。誰笑得官無口舌。敢云驚俗有文章。聚來國族星應動。人自羈遊夜未央。濠濮翳然君獨勝。何當四本擲嵇康。

吳日生易招同楊維斗夜飲酒閒論事有感 八月廿七日

清夜招攜更幾人。一庭寒月敞城闌。同時恤緯心原素。卜宅開尊意自傾。驚座孟公秋入轄。尙平揚子草爲鄰。酒闌莫問文章事。敢謂吾衰尙有陳。

酬湯友僧朝雨見憶山齋

山中寒色竹亭深。溼滿虛窗翠欲沈。囊筆未能生氣象。懷人偏爲動陰森。月明夜永空疑夢。雨勢朝看好助吟。有友如君時見憶。投來清句又高林。

陸履常坦招飲西郊草堂其尊人子垂先生出所藏古硯見示

一尊郊外客前陳。顧我登堂喜拜親。負郭無田猶自勝。傳家有硯未爲貧。秋涵氣象宜高隱。醉辨堅貞可德鄰。試問同來工筆札。相聞憑几獨陳遵。

懷朱雲子用前韻

我懷大雅向誰陳。與子風流氣獨親。得意未逢人異代。長卿徒抱壁爲貧。客星武阜誰千象。秋水山塘卽近鄰。新月遲來爭賦就。敢云古道有同遵。

蔣赤臣之紱舟中用流字

蘇州好景古荒邱。羈客相隨擁櫂遊。共有清尊消落葉。幾多度曲入扁舟。一時名士歸吳國。八月黃花報暮秋。潦倒不知誰去住。憑將詩句競風流。

自注。赤臣從徐州歸洞庭。時于燈下看菊。

次韻顧子方飲虎邱寓中

積葉空塔翠滿庭。猶于簷際辨峯青。相思輒過門無字。作賦同登地有靈。幾度殘秋偏在客。偶然醉酒敢邀星。只今沈冥紛紛甚。與爾羈遊恥共醒。

次韻子方卽事

老大詩人漫有情。偶然投佩狎鷗盟。風塵莫問張羅曲。閨閣羞傳折柳行。冰管可隨殘月散。榴臺不共曉雲輕。越溪寂寞無消息。誰爲乘舟逐范卿。

李仲木舟中集同諸子分波字

錦帆簫鼓曲聲和。入暮微風水欲波。公子夷門能好客。故人燕市共悲歌。燈前翠袖司觴虐。醉後霜楓解色酡。不爲酒杯澆壘塊。吳閶曾得幾迴過。

楊龍友月夜過訪投贈詩扇并言寇警寒露日

山寺秋殘客思闌。君移蹤跡破烟寒。搗來懷袖投珠玉。猶爲文章惜羽翰。旅夜故人多歎息。中原羣盜况江干。相逢不盡澄清意。明日無忘石上看。

施辛度送菊有序

辛度饒將略。予往訪之。出水戰圖相示。又引觀其藝菊。因言居崇明時。曾樹菊二十年。多至三百餘種。今以應聘至吳。不能見當年之盛。然亦有可觀者。因惠數本。作此謝之。

山齋秋色問誰移。好事曾聞海上時。不盡風雲生筆陣。猶然霜氣寄籬枝。葡萄塞外知君志。鵝鶴圖中卽我師。若使烽烟消澤國。青門莫訝菊花遲。

答張草臣

知君曾唱大吳風。可與人閒缶鼓同。不道三都出兪父。漫疑四本畏嵇公。羈棲竹屋因山靜。投贈徽音比玉攻。爲我蒹葭懷咫尺。何如下日醉丹楓。

許孟宏元博招飲因觀其藏書令子孝酌澗在坐

多君絕麗擬班張。飲我花時氣盡霜。已羨讀書多鳳蠹。因嗟絕學自麟亡。主人不用先投轄。羈客何須獻束羊。共愧夜深渠祿事。曹家猶富石爲倉。

次韻邢孟貞叻見訪

偶來吳國抱禪關。有客秋吟夜到山。觀樂無譏鄙以下。論詩斷自魏初還。友聲飢渴君如怒。大道蕪蕪我未刪。強欲和詩書所見。紛紛脫葉點苔斑。

次韻顏方平同周仲馭張天如孫孟朴沈聖符吳扶九振六見訪

相看霜色盡吳中。共歎黍離已降風。患難弟兄時聚散。誅求文字等窮通。幸遭聖世寬鈎黨。忍說諸生號小東。卻有先憂如我友。爲傷殄瘁是虛空。連年兵燹四郊通。游子深秋似遠鴻。滅刺不聞今日事。班荆猶見古人風。同來道故非看竹。與共閒吟自掃桐。若道天涯無咫尺。相逢莫漫賦飄蓬。

彭殷源雅集西巖將有鴈宕之行

誰從雲外問天台。情勝人繇瀨水來。已羨遊航盈橘柚。何當騫旅卜鄒枚。風摧病葉飛僧屋。酒散寒香繞霸臺。此去定攜孫綽賦。赤城霞色幾時開。

黃心甫傳祖自無錫貽贈二詩予過錫山不值因次韻答之兼致諸友

爾從無錫付桓譚。投我新詩霜色酣。豈有知雲須後代。卻疑過鄭在江南。東行誰識人驚宿。望氣何如客

到函莫訝及門空鳳字。大邦襟帶盡朋簪。

同劉輿父登郡樓有感賦贈

幾見江涯戰未休。久來騷客尙登樓。靈光似爾偏能賦。漆室何人肯共憂。羣盜半疑天地滿。諸生幾應廟廊求。風塵遊處同蕭索。不是懷瓊強自投。

遊橫山寺有序

橫山者。去予家十五里。奇峯疊嶂。拒日概雲。比之九華。尤爲特秀。以處僻隅。卒鮮遊涉。故山名不著。山之麓。又有峭壁千尋。環帶五里。而寺居其中。山之下。長川奔浪。出沒蛟龍。上則松柏參橫。杳靄雲氣。耳目所及。蓋東南之靈壤。而圖經之逸勝也。予少時嘗讀書其間。欲記述之而未遑。今春偶來。爲作是詩。

不到橫山十七年。舊時雲樹尙依然。人閒足蹟誰曾問。世上圖經偶未傳。峯落天如開菡萏。流奔石亦舞螭蟠。哀猿野鶴時相喚。心折幽棲世外緣。

周方伯孟巖參時先生夫人雙壽先生仲馭膳部之尊人也

甘棠何處不成陰。歌向東山又見今。宏景榻香蒲萬本。麻姑峯近蕨千尋。尊前霞爛光生髮。坐上雲怡喜到吟。共羨年年雙馭鶴。那知十載已抽簪。

贈尙寶方潛夫孔炤先生友人密之其冢嗣也

一時折節盡公卿。有客探懷刺未輕。忘勢古人存至性。交歡國士愧虛名。文章安樂真堪鄙。烽火江淮幾處清。似我書生偏整惜。况聞賭墅舊陪京。

贈金天樞光宸侍御四月二十五日作

冠蓋京華盡鷺班。何人抗疏卽身還。天山使者曾埋轂。殿上孤臣敢犯顏。直道何慙吳市卒。憂時莫羨謝公山。清風暫被長干曲。其奈雲霄已賜環。

送孫碩膚計部赴武選內詔

白下司空甫藉君。中樞徵檄復如雲。新揮羽扇元才子。夙著鴻苞盡大文。安攘只今談影響。蠻夷自此響聲聞。憂時草野同心劇。敢爲當歌歎失羣。

贈孫克咸臨

近讀孫郎白下詩。風流不異鄴中時。故園憔悴猶兵火。旅寓蕭條但酒卮。著就爲君輕倚頓。抱憂忘我似支離。江東兄弟推誰勝。明月秦淮好自持。

將往無錫答方爾止詩言別

有客乘船下錫山。白雲尊酒駐離顏。那知道德文章意。不盡欷歔感慨閒。遊倦似予何足倚。才多如爾未應閒。請看南北烽烟日。誰占文星虎豹關。

同子方避暑舟中卽事 六月大暑日

廣亭日赤人難坐。涯闊風多舟最宜。移來一榻猶書卷。况有雙鬟對酒卮。侵袂水波疑雨濺。穿林霞色與雲迷。滄浪有曲君休聽。鼓櫂江南未有詩。

周勒卣楊龍友集子方兼山堂分得十四寒 初四日

七月青林烈日團。高堂客聚亦生寒。偶然澤國琴樽共。遂作龍津氣象看。雅道定知刪蒼蔚。老成今復見波瀾。相期莫訝吾曹在。赤白何人制探丸。

答黃心甫

清風盡日被階苔。暑日霜飛到酒杯。雅澹湛思誰並勝。沈雄絕麗我非才。共驚元有陳遵坐。自失應從叔度來。十五國風刪可遍。懸知閉戶獨精裁。

胡修能學博于尊經閣集同子方及同官陸孟覺

一尊高閣散埃蒸。秋入行廚坐欲澄。不道守辛神寂寞。還驚投轄氣憑陵。國中難和原推楚。季子無譏未至鄙。誰謂盤清餘苜蓿。授經應已卜飛騰。

陳伯符畫次尾子方對吟圖各走筆書此 七月二十九日

誰將寸管虎頭筆。寫我雙吟對據圖。不貪詩卷留天地。可使鬚眉愧丈夫。一邱一壑莫須置。爲馬爲牛祗任呼。挂此高堂應共笑。兩人吐出心肝無。

秋興

天空何處不淹留。客倦梁溪已半秋。遊子自驚時序變。野人偏切廟廊憂。但聞逋寇廢朝節。未見長纓□□頭。獨有虛堂同好友。牢騷猶賴酒杯浮。

腥風前歲蔽三韓。此日中原盡寇殘。馮翊新開丞相府。將軍舊戴惠文冠。每聞漢世憂勤詔。豈爲齊人口舌官。四海何知酬聖主。草茅空欲自修翰。

十年日月荷重離。尙憶先朝警朕師。義士九原甘鎖伏。愚公一夕盡山移。南京鯨鱷波猶動。東國麒麟道未衰。政好誅鉏勤載筆。敢言刺舌是明時。

聞道諸生七百餘。同時上國被徵書。漢家可有神明待。郡將何如守邸居。未必通經窮董賈。空教言事類莊徐。臨風爲讀宣城疏。江夏遺書獨啟予。

涼風早已散蒸埃。閉戶閒愁轉自催。近報雲中謀款口。久聞江北泣遺孩。吳門紙貴違心去。京口蝗飛撲面來。世事只今誰可問。高牙無怪日崔嵬。

漢武憂邊重建威。兼材難復似翁歸。禁民挾矢須吾對。比士精騎認廣非。緩帶自能增敵愾。投壺曾說破堅圍。禁中若肯推張仲。罷筆欣從短後衣。

東京名士盛如林。鈎黨猶明九死心。結社只今多尾續。臨文無賦感秋吟。通都誰沒禰衡刺。下邑爭分鮑子金。莫訝菰蘆倚舂盡。江南元自有朋簪。

窺林織月娟娟靜。拂枕微颺窈窕輕。作客不知家近遠。怯寒猶藉夢分明。賡吟自笑緣詩債。砧杵還應動

旅情。此去青霜歸櫂急。江天悽絕鴈來聲。

贈馬君常世奇太史奉使勅諭三藩國

天子飄然讀子虛。同時不意得相如。豈無諭檄通巴蜀。已自橫經擅石渠。雙劍氣收門下士。一星光傍使臣車。東平卽有賢王在。漢法難求太史書。

過義興贈陳定生

河上林端望物華。上卿門第翠交加。開軒似爾書爲幄。作客何人友是家。感事已知忘鳥雀。傳經應復護雲霞。庭前不盡紛紛下。笑指霜清更幾花。

答蔣章人偉見訪定生家有贈

蔣濟當年豈醉徒。重君今日復投珠。却驚高論輕曹李。莫訝虛名到顧廚。客倦自知傷木葉。詩工應復笑吳歛。潁川豪士何人近。幸有同心調未孤。

武進馬培原嘉植明府見顧并招飲予以半夜去未報謁復貽此

漫道河陽縣有花。毗陵今復擁雲霞。心勞撫字餘三載。政頌神明變萬家。安邑風清真自勝。臨邛客過莫相譁。于今漢相推循吏。取次門前好護沙。

開口憶劉伯宗燕中十一月二十八日作

念爾爲儒恥附聲。問時應屈老先生。爭談世務輸三子。久著鴻文抱二京。玉貌何人能卻敵。義渠難用莫

言兵漢家卽使神明待。敢謂難居實盛名。

和輿父感事

聖人七月召平臺。嗟咄曾憂□□來。誰料□□不大舉。卽看關隘已全摧。密雲山海真成戲。政府中樞莫定猜。三輔近爲戎馬窟。燕臺何日息烽埃。

聞道三河大蔓□。嬰城不問寺人呼。殿師已失夙沙衛。堅壁難言周亞夫。北道主人誰足恃。東偏羣盜况多虞。上方宮監年年出。未見何宵卜楚烏。

□□□□苦無□。河洛關齊盡戒嚴。九死犯顏售繼盛。一身捍國想于謙。豈無庚戌樞臣法。屬有東苑大將占。若使用兵甯下策。□□何日可成殲。

燕山雪色未全凝。□□中宵處處興。晝夜可馳五百里。烽烟無恙十三陵。通津南北咽喉繫。居塞東西羽檄騰。何以至尊憂莫解。誰如介子獨稱能。

南都司馬赤書馳。皖上中丞夜濟師。朝士云誰能辦此。平原不識作何爲。山前山後騎充斥。河北河南賊號窺。洗甲乾坤知有日。草廬空復抱艱危。

方罷臺試有傳濟南已破者 正月二十九日

試科何異事從戎。使者持衡第戰功。豈謂秀才般往嗣。卻逢化俗蜀文翁。國家道長尊經術。□□天□急轉攻。見說藩封今已陷。空聞十二有山東。

自注。時學使爲山陰楚畹金公。

壽冒嵩少。起宗憲副五十詩。辟疆囊之尊人也。

海上何人進壽卮。風流原自治兵時。東齊大國憑安堵。南部天卿舊有司。老笑平津初上第。心如蘧玉正知非。趨庭已賦靈光殿。閣筆陶然醉似泥。

長干舟中東應試諸子

小艇城南雨後涼。暫拋書卷濯滄浪。櫓聲曉集漁人網。塔火宵懸水面光。幾處烽烟餘澤國。莫言文字老名場。閒將一曲瀟湘意。好爲諸君夢帝鄉。

大雨臥赤石磯舟中聞定生來驚起輒返駕矣

何處秋聲到水邊。洞庭一曲帝城偏。石閒久逋高人臥。塵外誰知避客船。豈有津源迷咫尺。竭來風雨隔林泉。夢中何必重尋路。笑我乘舟未見仙。

飲梅惠連寓中兼言別

與君酒罷更三歎。清漢何能共羽翰。楚士自憐蘭作佩。吳人猶聚鷓爲冠。空江柁傍龍鼉影。故國烽迷赤白丸。似我行藏偏不定。風塵誰比漸卿看。

清明前一日清涼寺登臺作

有客幽棲古刹傍。春風極目盡蒼茫。許多樹杪人家出。不盡江流衣帶長。人靜可知忘節序。臺空若爲寄

悲涼干戈擾攘何時息。指點淮南古戰場。

陳臥子補官北上贈之兼致宋轅文李舒章彭燕又

才子因誰早著名。卽今離合共陪京。移書何用稱江夏。惜別依然到石城。墨妙淵雲文未墜。酒酣卿。漸氣嘗傾。春風無限淒涼色。爲向長途戀友生。

袁州解華胥經達太守因友人張爾公遠致書幣

江外新傳渤海名。使君三歲擁專城。天開五馬驕騮色。世聽雙龍風雨聲。門下近聞推賈誼。書來莫誤羨樊英。卽今四海須平治。漢世循良已上卿。

魯孺發可藻避亂梁山予招之來南

白下逢君轉徙餘。又聞鼓棹倚江廬。漢陰舊識龐公宅。關內新移墨子書。問隱故山猶未可。買田占地欲何如。道南大宅知誰讓。江左風流亦啟予。

范大司馬質公景文盆中生並頭蓮

並蒂芙蓉本自雙。自注杜句今看華露護霓裳。翩躚競舞仙人掌。窈窕爭承玉女妝。豈有春風先草木。若教麟信兆芬芳。一時授簡知誰勝。拌醉如泥司馬堂。

夏日暫園自注同從弟彥應筵作

孤亭斜倚屋隅西。下瞰平疇萬綠齊。坐起經書惟自擇。朝昏野色似相攜。高蟬急噪聲偏寂。微雨隨來望

欲迷散髮不知三伏過。桃花無意絕前谿。
古木陰垂四代餘。小窗憑倚得幽居。窮村似我還隨俗。論世何人解讀書。長日忘機師海鳥。終年挾策逐
衣魚。牆東未許王生去。猶喜時違長者車。
自慙蹤跡熟逢迎。暫臥荒園體亦輕。一月無書煩報答。三年此日卽清平。問奇誰解題門去。展卷真知閉
戶精。敢謂此中吾獨勝。公卿何用妒虛名。

自注。時傳貴人欲殺三名士之言。

今年五月雨爲霖。十日波濤瀉澗深。消溼何須醇酒醉。勿疑猶自喜朋簪。閒看夕炤來新霽。愛聽好音變
夏禽。把卷不知時序易。山中先已氣蕭森。
羣盜中原尙未收。亂離偏切草茅憂。敢于終食忘三歎。難以生平置一邱。北闕故人慙上第。東江名士說
清流。四方卽恐妨林臥。高鳥還須笑樹頭。

劉用潛潛宅中七月開玉蝶梅花一枝

隴上曾無驛使迎。一枝秋色可勝情。寒香墮後魂猶怯。解瓣飛來夢欲成。幸有海棠供伴使。不教籬菊號
先生。亭亭月色渾如意。誰索塔前笑語聲。

商邱吳讓伯伯亂延仲伯裔兄弟有詩見懷答此

自我懷人帝子邱。西風葉下大江流。不因著姓吾宗國。誰信知名第一流。關內布心俱意氣。菰中僑胔久

沈浮。可堪豺虎中州遍。文字猶勞聖主求。

寄仲馭

秋深游子歎離居。爲念華陽獨臥廬。蹈海喜人言往事。積薪憎說見新除。計曹慷慨西州意。禁院蕭條圯上書。極目九關蹲欲食。淮南山小莫疑余。

自注。時黃石齋解石帆。就逮。葉戶部疏救被杖。八月初七日作。

送杜子皇潯北上

西風八月水猶波。遊子宵征意若何。門下未逢徒有淚。市中欲和不成歌。黍離已降知誰歎。天壤論才獨爾多。此去自懷明月貴。大冠莫訝舊嵯峨。

蔡香君太守招飲芙蓉亭

木脫都城霜下初。空亭流映尙芙渠。自來習郁池邊醉。難得中郎枕內書。好事不知秋黯澹。高談偏覺意蕭疎。使君莫戀驂騑色。且與寒光問麴車。

次韻送范大司馬質公先生諫謫歸里

排闥清時共未能。孤懷獨許雪霜凝。一封爭著三朝節。雙淚窺彈五夜燈。漢殿可聞旌折檻。堯憂何日解襄陵。大臣身退心猶苦。明聖天王罪自應。

朝揮白羽暮青林。猿鶴東山意自深。賭墅不聞碁手劣。登朝忽訝履聲沈。已知後宅容宣室。敢向新亭作

楚吟去國主恩偏覺重。忠貞未改歲寒心。
大臣何用號多能。許國高居第一層。神廟至今猶競黨。虞朝自古未辭朋。公看隼上方憑射。誰肯鴻飛獨
遠矚。卻笑書門偏不達。退閒那識澹于僧。
漢廷誰右大司馬。節重官輕早乞休。少伯傳家猶小艇。征南憂國雅輕裘。依然入夢慙郊壘。且與忘機狎
海鷗。一臥不知身更穩。草堂原自帝王州。

除日

暫此登樓雪未消。連年輕擲又今朝。軍中積苦頭傷白。世上虛名夢亦搖。豈有千金成市字。猶餘五石惠
生瓢。椒盤旅寓空相逐。一飯何人念聖朝。
幾度客中逢此夕。况持濁酒禦寒威。煖衣飽食慙非分。刻羽引商和者稀。天下徵兵猶未解。窮鄉多亂獨
難歸。霏微恨不盈街雪。年熟欣爲萬姓祈。

樓山堂集第二十六卷

詩

七言律

辛巳元日和伯宗書懷兼訂移家之約

幾年同學辨王正。此日題詩逆旅情。下客有憂方嘆食。中原無歲不窮兵。登堂率爾真佳事。並世齊稱敢避名。從此鹿門猶未得。願隨周子歎黃生。

郡邸度歲王達卿大參連日見招因索鄙句

遊子蹉跎感物華。相逢情切卽爲家。頻來自覺盤飧重。卽次偏驚意氣賒。荒歲五朝今再見。憂時一飯共三嗟。莫疑猶有陽春曲。客但能歌下里巴。

遣興

客邸逢春莫問年。何堪廿載歷烽烟。劉清陶舍皆爲相。李牧廉頗不在邊。老我未逢門下遇。夢君時在聖人前。但傾濁酒消懷抱。著載狂夫敢復傳。

元宵大雪戲拗體

去冬兩月曾無雪。今歲雪大三尺深。往來市口人不見。燈火元宵戶亦扃。但沾濁酒無與醉。欲問梅花何處尋。卽恐車馬妨高臥。呼童但弗掃空亭。

移家南京留別王石卿家柱明府

河上神明政絕羣。城頭姑射翠微分。地當盤錯琴絃靜。鳥授仙人象緯分。遊倦自慙稱國士。年荒無計倚賢君。白門如問江城事。爲道清風久著聞。

酬方孩未震孺侍御見贈移家白下

幾年飄泊本江東。此日移家道未窮。負郭時勤長者轍。投詩爭拜丈人風。羈棲爰止猶容膝。決起翺翔笑轉蓬。敢謂此中龍鳳有。望衡何幸倚龐公。

何辛子楷給諫左遷南禮部閉門著經時有見贈移家之作奉酬一首

何來寶炬炤江湄。留滯東南道未衰。疏草已聞爭上殿。經師猶幸得同時。慙如鍾會探懷擲。噩若南榮見父慈。誰信知雲須異代。褰裳還自此中期。

贈張鮮民璋少京兆

清風冠蓋亦冰涵。獨幸相逢已道南。多壘自慙卿士夢。聚徒猶盍聖賢簪。當年半面羞京兆。此日忘形愧魯男。似我有懷君獨歎。可疑表餌是空談。

馮躋仲景第寓戶部園郭孟白萬程招同涂石丈世琳移尊堂上

南國司農也有園。一枝遙借帝城偏。鳴鑣並立花邊馬。好事能移沼上筵。豈有星光臨雅集。難言龍臥淨烽烟。明時不用歌燕市。慷慨觴飛雨後泉。

酬方元錫予成吉偶亨成姚覲侯文烈若侯文然兄弟見招并贈詩

我來京邑亦隨羣。未必東行宿已分。自笑比倫非管樂。卻驚兩姓狎機雲。一時感慨消于酒。四海波瀾獨有文。迭奏清商風雅應。城頭暝色薄簷曛。

郭孟白以淄硯見贈

紅絲曾見出齊州。文理無如淄產遒。龍尾鶴睛輪上駟。驪泥雀瓦後羞牛。誰因雕琢留青眼。我已消磨半白頭。從此欲焚猶未得。代君作檄取封侯。

慈湖曉發微雪示曼殊

客途無伴喜相依。並轡荒村尙近畿。入夜漸知寒色厲。出門欣見雪花飛。敢言道殫緣天意。未必蝗消解歲饑。安得瀰漫深幾尺。與君沽酒款前扉。

當塗陶氏兄弟假館授餐作此謝之

陶家五柳舊垂門。滿耳埧簾又弟暈。好事嘗盈堂上客。移情偏築宅旁園。偶因竹石稱驚坐。不盡琴書愧授殮。幾夜酒杯浮雪色。歲寒他日問平原。

邱中大雪憶予往年有望雪詩今更作詩志喜時沈崑銅云來視予

作客難逢三日雪。辛未于今已十年。盈尺占豐題謝賦。閉門卻跡愧袁眠。無衣何必愁公子。有歲還同咏甫田。獨感故人時見憶。銜杯欣對竹枝前。

雪詩用東坡韻 是日大雪節

雲端誰擲玉纖纖。飄落人間最苦嚴。但願豐年民有穀。何妨殘歲食無鹽。自注。時鹽貴甚。秋濤怒沸高于屋。天雨低垂近在簷。一夜廣寒春欲動。搔頭斜插靄爲尖。

寒原不見影如鴉。凍合溪雲幾萬車。人間難覓三珠樹。天上平鋪一夜花。豈有虛名來授簡。卻逢飄泊久違家。明朝且欲衝泥去。指點離奇滿徑叉。

雪詩再用前韻

爲詩何必學輕纖。偶和東坡律戒嚴。不用形容工羽玉。卽如清淡點冰鹽。十年逸句還來夢。一夜寒梅倒壓簷。卻便推窗眺遠色。平空失去幾峯尖。
虛堂古木噪昏鴉。客有愁心載滿車。歸去故人須脫粟。折來歲暮指寒花。畿南蝗疫真難見。江北烽烟更幾家。自笑胸懷偏偏側。猶餘五嶽立丫叉。

十年以來。曾三和此韻。汝寧府齋。及上河客舍。在上河者。四首已失原草。

雪中鮑曼殊胡胡之飲于邸舍。劉比部程廣文及陶氏諸友并移具召姬度曲用前韻

諸君過我意纖纖。不解江城夜號嚴。飲戶角飛明月鱗。冰盤羔切水精鹽。自注。太平美羊肉。未知酒德能

移宿。可有星光近在簷。曲罷青襟渾欲溼。彈箏爭惜玉牙尖。
燭殘莫問髻如鴉。豈有西陵油壁車。我自酒杯澆磊塊。君看雪色盡空花。願驅螟螣深千尺。相傳雪深一尺。蝨入地一丈。笑指壺釐共一家。盡醉不知天欲曙。橫窗竹影已成叉。

采石孫幼窳雪中餽酒過訪兼有登山之約因贈

山陰訪戴夜還船。何似君來雪正懸。卻感行廚衝滑至。况多相見意歡然。一時壇坫非吾敢。三國英雄幾姓傳。試問江亭明月夜。可能同弔李青蓮。

和尙港阻風荆襄兵警南京已城守

憑空礮閣俯平流。側望高危勢欲浮。一息波濤長萬里。十年旅思載孤舟。已聞涿水橫中國。况說烽烟蔽上游。我亦欲乘風直去。猶然窮港狎鷺鷗。沛爲水壤。時賊破荆襄。而左兵又東下。

莫說江南尚太平。亂離今復見陪京。卽傳空國登陴守。難使孤舟破浪行。風力但能留倦客。天河何日洗驕兵。柳條欲舞花初發。無意僧寮聽早鶯。

時上江兵警傳南中失機書於佛閣上

自南京歸留別所知自注時崇禎甲申三月十八日

四年挈室倚南京。二載兵戈日數驚。愁聽羽書來北直。敢言象緯應東行。吳門未穩藏梅福。江夏何繇致正平。寄語諸公憂社稷。誰能不出奈蒼生。

自注。聞賊已破真定。諸公有留予者。故有江夏云云。

山中五日聞三月十九日之變

五月五日天欲傾。悲風萬里動神京。劇隨父老蒼黃哭。忍說君王慷慨行。自古主憂猶責死。卽今國破盡
偷生。閉時漫數詩書效。華嶽山高恨未平。

漢家功德尙謳吟。誤國其如盡盍簪。誰引豕居龍鳳闕。卻憐鷓序馬牛襟。敗亡何必曾先見。痛哭猶存未
死心。獨有深山雲物異。悲涼夏木變霜林。

聖主焦勞十七年。那堪回憶倍潸然。憂危誰下銅駝淚。灰燼空傳紫禁烟。北地有懷悲漢謀。中興何日見
周宣。南陽豈少閑吟者。聞達毋甯得苟全。

自注。先子慮北京必不守。聞者唾之。

聞陳青谿殉難

十年水部識青谿。謫吏仍甘死若饑。微屨何必能存魯。王蠋居然欲奮齊。藏血燕山風盡烈。招魂江上草
含悽。故人醜酒吞聲哭。南北於今路已迷。

過陳定生寓舍

客舍相逢秋已過。不知誰念舊山河。平時懷抱風霜盡。細數交遊涕淚多。似子明安猶請獄。何人訟固肯
提戈。請看大地荒荒色。對酒能無倚漸歌。

和尚港阻風用去年韻

霜落江寒水半流。依然野泊問沈浮。如山波立縣千練。似葉篷輕小一舟。滿市公侯忘載溺。幾家村店學優游。閑觀最畏人閒世。肯信風濤下海鷗。嘗疑宵旰未昇平。爲見衣冠又舊京。一姓乾坤猶鼎革。終朝風雨任留行。藏舟是處求深壑。惡浪何曾出亂兵。歸去東山茅屋在。雙柑從此學啼鶯。

中丞程公世昌以池州兵使開府蕪湖

蕪關旌節一時新。河內還應借寇恂。江漢有人揮白羽。乾坤何處著黃巾。七千士奮惟君子。十萬師賢盡部民。共訝後堂容對酒。彭宣猶自感風塵。

苦雨

武昌旌甲蔽江濱。到處流離說苦辛。二麥未收夏四月。千家共歎雨三旬。忍聞郭邑將沈寃。難信谿源已絕津。山裏尋山猶恨淺。誅茆厓隙敢逡巡。自注。時左兵之亂。池州城守已四十日。

將結茆橫山原深處因宿谷口小菴

空山直入漸烟低。歷磴循溪到轉迷。谷口緇流真石隱。林中蘭若半雲齊。干戈薄海鐘聲外。名姓前生澗水西。勞擾幾年餘一宿。終宵清夢狎猿啼。

非注在治南百九十里。

敢臥

傳檄東宮指顧閒。投邊萬騎往郊關。江城守已非余闕。軍帥聞猶似伯顏。未雪大仇天可共。豈容沙漠幕成斑。紛紛羣遂論興革。敢臥蓬門十畝閒。

觀兵泥灣題寺壁 非注在城西南九十里

何處能尋虎豹關。谿源天設此泥灣。已看下葉霜威肅。轉覺無聲之子閑。小口自然疑草木。大明終是舊河山。與公努力勤王事。漫問鐘鳴到枕閒。

石灰沖絕命詩錄遺一句

半世文章百世人。

五言排律

哭陳元靜 自注陳客死河間

偶託天津信。猶疑事有無。何當遽物化。况復阻邊隅。自古誰非死。斯人獨可吁。照埋空掩獄。雉悔竟淪笈。邈矣羈魂逝。悽然旅櫬扶。病窮費爾志。存沒感吾徒。文字荒秦嶧。風神落藐姑。絺彈應已絕。鍾聽若爲孤。世路通如蜀。人情只一芻。玉樓知不苦。血汗視神駒。

重陽雨夜飲弟發若抱觀堂

天地生寒早。風徐入暮艱。三秋餘黯淡。九日阻幽攀。節至花猶待。人清夜更閑。酒消一斗醉。雨鎖二扉關。響碎牆陰竹。雲沈戶外山。溼光燈火散。縣滴笑談刪。孤唱摧庭葉。深杯冥砌斑。登高雖故事。樂此便開顏。

方孩未先生見招兼惠詩扇酬八韻

昔和滕陽句。今登元禮門。後堂容對酒。往事况難言。一念真忠直。此身具本原。老成天獨護。後死道猶存。蕩寇無妨臥。移家不避喧。那知霜氣肅。復此春風溫。草木十年臭。聲名萬古尊。誰云蕭艾盛。豈漫蔽行軒。自注。先生丙寅被逮時。題詩滕陽驛。予曾和之。

曉至無錫子方于丙夜歸自錢塘喜成十二韻

寂寞王猷興。殷勤叔度恩。三春雙鯉墮。千里一帆隨。自我來江國。方君滯海湄。那知相聚首。猶自未移時。郢曲元難並。延津或可疑。獻衣無季札。縱酒和高離。率爾真休暢。斯人獨偉奇。論交忘作客。羅拜喜呼兒。天地生戎馬。文章卽蕪靡。廓清吾豈敢。推挽子同期。道大難爲用。憂多不自持。青燈照炯炯。莫負此鬚眉。

贈孫克咸并序

克咸自其外舅開府來。小飲劉輿父家。自言曾臨戰殺賊。并言賊情形甚悉。因贈十六韻。

十載寇猖狂。踉蹌哭萬方。官兵徒轉徙。理督總周章。楚撫推人望。廟謨本聖王。英姿誰幕客。宅相有孫郎。文筆曾干象。寶刀初試霜。那知文字後。卽復挈星鉞。左右能馳射。東西正殺傷。論功宜上賞。憶母卻還將。已渡陳倉道。猶登魯肅堂。相看各勞苦。語次復精詳。河朔傳滋蔓。川秦更跳梁。連雞人用勦。築舍日成行。

天下憂方大。吾曹道自臧。臨戎樂戰鬪。抱膝計安攘。以我衡今昔。如君卽傅張。相傾同濁酒。萬里看長浪。

中秋寓樓書懷十六韻 非注在城中大井四北

暗數今宵月。旅懷十四秋。出門家卽遠。隨地友相求。王室比多難。吾生尙薄游。聲無一命寄。志欲萬夫遄。著述名徒盛。詩書效未收。世方希管葛。學獨恥墳邱。泛宅稱先識。敷天戴大仇。烽烟驚海甸。風雨泣燕幽。賊勢猶分陝。人心豈去劉。東來芳草創。北伐忍淹留。遵養師王道。英雄笑仲謀。有田曾祀夏。不戰盡封侯。鴛鴦班何滿。干戈氣若囚。興言真歎絕。感事卽深憂。抱膝寒生袂。銜杯漏竟籌。坐移檐際色。蕭瑟動虛樓。
自注。北變未聞。予卽已挈家山中。

五言絕句

昭君怨

絕塞風烟迴。心將去鴈同。琵琶空有曲。不到漢王宮。
玉關妾已遠。猶自恨蛾眉。寄語承恩者。黃金賂畫師。

杜湖 自注杜湖卽湖岸

客歸偏有興。鼓楫獨扁舟。遠浦空寥廓。深江自此流。

渡淮

驅車千里遠。鼓楫一時過。頃刻多風雨。同來渡此河。

盈盈流一帶。天地此方中。不渡淮河水。那知疏鑿功。
季園

高岡松樹多。絕壁流泉繞。上下前後山。清眺夕陽杳。

梁溪曲三首

本自秋浦水。忽爲梁溪流。梁溪流不盡。歡去使人愁。
梁溪多淒風。道是白門來。自歡出門去。梧桐葉葉摧。
愛飲梁溪水。愁作梁溪客。明月照一方。歡自疑今夕。

樓子歌代怨三首

樓子比金屋。繡幃日垂垂。妾非邈雲中。歡胡道旁遺。
樓子好明月。金爐手自煨。輕颺蕩纖幌。知歡來不來。
樓子復樓子。歡使妾住此。上樓無轆轤。下樓如流水。

和子方阿子歌三首

盡日寫心怨。秋風阿子歌。猷州不在天。歡今欲如何。
阿子好容顏。行行淚且漣。腸中轉車輪。爲歡不得閒。
漢水非吳水。鹵莽洗阿子。阿子顛倒情。終當爲歡死。

光州胡胡之避亂來南與予同客當塗二詩贈之

冬末同爲客。相依意獨深。不因羈旅日。誰識歲寒心。
浮沈雲在地。澹泊月生林。過我猶尊酒。無多作楚吟。

六言絕句

題鄒滿字爲僧作圖

一片石色疑雨。幾枝松勢參天。茅屋枕溪寂寞。老僧禪悟何年。

七言絕句

湖心寺立秋

天高漠漠水平流。堤影山光背郭浮。蓼葉欲齊烟欲澹。年年秋色早湖頭。

閑敗

昨夜西風自北來。傳聞烽火徹燕臺。熊都意氣今何許。蚌玉能堪匹馬回。非注。熊都謂廷弼也。

將軍灑上笑袁楊。又見輿尸督府王。□□只須兵十萬。可憐口舌是金湯。非注。袁崇煥。楊鶴也。王化貞自許以十萬□□。

隴西曾說有中行。賀將前身亦少卿。縱使漢庭無衛霍。如何降口倚長城。非注。李永芳事。
出塞何人右武賢。營平未見遂屯田。可憐門戶能傾國。額上中樞已待邊。自注。時熊主守。王主戰。本兵張

鶴鳴則右王也。

一重山海鐵門關。肯與口人飲馬還。天子只今思鉅鹿。公卿誰復羨東山。

偶過蓮花菴

自注南京太平門外後湖之側

湖上棲遲已數旬。綠荷開盡一時新。誰知更到鍾山曲。又得蓮花梵語聲。

北峽關看壁閒二詩

一傷奉使一公車。辛苦誰題驛壁書。我亦羈遊無定在。卻看天地總蘊廬。

所見

風吹十丈路頭塵。見怪蛾眉一幅巾。斜抱琵琶驢背上。相逢容易是途人。

春河鋪

慘澹雲垂四野齊。斷橋殘樹細沙谿。那知一醉春河鋪。野色烟寒日已迷。

代贈

何處飛來掌上分。漢宮纖秀猶離羣。夜深髣髴無人見。疑是華峯絕頂雲。
五湖舟裏未應閒。肯載羅溪越女還。亦解蛾眉偏見妒。且評江上幾青山。
芙蓉九月澹新裝。不畏風濤解送郎。卻憐照水鴛鴦影。肯向臺中學鳳凰。

郡城東湖

遠浦孤舟萬里秋。滿湖寒色坐中流。城隅一曲空飄泊。爲有漁歌到渡頭。

別意

無數江楓照水紅。離情欲斷碧天空。渭城有曲無人唱。早與帆開一夜風。

自高田至秋浦道中

參阮嶺下卽澄潭。破石山頭氣似嵐。指與故園三五里。蕭疎野色任躋探。非注。參阮。破石。皆地名。

石出溪頭水有聲。北山渡口問漁行。高巖一片雲中落。題字何人著姓名。非注。北山。渡口。香口。五里。巖下

有刻石輝文二大字。餘莫辨。志亦未載。

人家十室九疎林。秋盡風敲萬木吟。石磴臨危盤七里。蕭蕭落日草連陰。非注。七里。石埭縣舊址。

千山色暮到楊潭。野店橫溪爲駐驂。濁酒寒燈消不盡。爲遲新月半峯含。非注。楊潭。渡名。

何年名喚女兒村。紈紵瓊漿意可存。隔岸朱霞如弄色。千章楓樹已黃昏。非注。女兒村。村名。

雞兒灘頭石半漫。虎子渡口霜未乾。兩岸青山渾在水。不知人向鏡中看。非注。雞兒灘。地名。虎子渡。貴池

石埭界。

林巖曲曲是泥灣。風欲蒼茫景欲艱。迴合溪源百六里。行人不羨會稽山。非注。泥灣。地名。

山如滴翠樹偏妍。蒼玉爲溪鏡是泉。寂寞桃湖陂外去。至今太白已千年。非注。玉鏡潭。桃湖陂。在秋浦之

清溪。

戲作

遼海干戈已十年。卽今烽火徹甘泉。漢家赤羽連宵發。丙吉何曾早念邊。
南京猶似六朝時。御史先驅拜法師。佛力何曾增敵愾。誰憐直北戰征兒。
下關夜泊見鄰舟有女年可十五六夜半聞舟中教琴聲甚苦

天涯孤泊歎飄蓬。客裏關心瞥見中。夜半卻聞聲切切。不知曲操爲誰容。
十五閨門未嫁人。可憐玉色落風塵。他年曲罷傷心處。輸與蘿村幾度春。

上新河代作

踏雪佳人到上河。清尊不惜醉顏酡。燈前擘紙書新句。莫是傷心子夜歌。

蓀谷

昨夜天風落素湍。碧流深浸萬琅玕。石梁不信蒼苔跡。爲聽疎鐘坐欲闌。

燕子磯舟中聞有閨人咏門泊東吳萬里船者與蘇武子吳素臣卽事各二首

幾年作客慣今時。誰信含情解誦詩。燕子磯頭同有賦。不因秋月寄離思。
出門萬里卽孤舟。客裏聞聲也自愁。可憐二子清秋句。爲聽傷心子夜謳。

劉伯宗寄所紀桐變事

客裏相逢盡酒卮。隔江何事悵流離。而今共道東南好。愁讀西川杜甫詩。

南京雨中遣興

十日都城雨未收。亭臺何處不平流。池邊竹樹相縹碧。水氣翻如屋上浮。
五月寒如十月天。平看萬戶盡冥烟。那知有客空亭坐。獨翫南華秋水篇。
聞說秦淮水漫橋。家家垣屋似飄搖。呼童閑問街坊價。莫愛茗香破寂寥。

山中感興

春雨蓬門喜笑開。故人六七上金臺。窗前不道真焚硯。又聽衡文檄使來。
林外黃鶯學語初。塔前蘭氣暖風徐。閒拋書卷觀農事。名滿人間總不如。

無題二首

樓子風清月色明。輕衫度曲不勝情。柳條欲折未忍折。醉殺呢喃聲更聲。
湖上春風花外枝。橋南載酒爲誰持。詩人不老多情思。猶聽初鶯宛轉時。

過嚴子陵釣臺

歙州行盡又嚴州。烟雨空濛載遠遊。爲問富春山下路。千年二石俯江流。
深山何處識生平。爲有滄浪釣月明。故人無意求天子。灘水難忘是姓名。

六月二十七日立秋

客裏今朝年又年。炎風赤日更秋天。梁溪不道江南樂。爲有清真第二泉。

早窺華髮初生鏡。晚報新梧又度秋。人生不得行胸臆。未見官封萬卷侯。
莫唱詩人白紵歌。可憐江北尙干戈。夢裏砧聲聽不得。悲哉秋氣獨誰多。
空堂蕭瑟動陰森。一月連牀風雨吟。此日生平都欲盡。文章昆弟酒杯心。

去梁溪將溯荆溪。毗陵華陽白門歸。子方同遊稍後至。期俟之定生家記別。

客子明朝放棹行。虛堂今夕酒同傾。爲君一月瀟湘意。淒絕江南萬樹聲。
兼山堂畔連牀夜。風雨清燈咏未孤。此去秋光多在水。夢中得句定相呼。

杜匏如索題其像

生平意氣未全舒。解言荆卿劍術疎。一幅鬢眉今髣髴。古人再見杜匏如。

江行

文章何用動公卿。鄙夫穉子亦縱橫。櫓師慣識聊相戲。似爾儒生浪得名。
日暮三山鼓棹過。夜泊霜寒姥下河。遍穿茆屋沽無酒。燒草兒童自和歌。
梁山赭山一夕過。櫓港荻港三日留。遲速早知風力定。蕭蕭木落大江秋。

見邸報自注武陵楊相公出視師

臨蔡何人是晉公。况聞方叔作元戎。九重宸翰親揮灑。磨石淮西好記功。
往歲三公數出師。成功難易未同時。文襄一定河南過。少語風前去不辭。

閨辭

嫋嫋春風氣正融。曉粧初怯日曛曛。錯穿鍼孔因鸚鵡。顛倒心腸唾剩絨。
盡日花飛四滿鄰。殘春猶見月華新。無言獨立屏風後。怕見垂枝影亂人。

南京所見三絕句

王、曹、劉、魏、近時有許、史、金、張、我代無。今日江南眼孔窄。不知羨殺幾屠沽。
十載烏頭宰相歸。中丞座主亦光輝。而今八座迎塵有。自古三公入市稀。
詔書遙出未央宮。四海齊稱罔極隆。即使漢臣能議禮。于今三教已渾同。

花枝詞爲馮躋仲納姬作

窈窕花枝醉後持。絳紗紅蠟影低迷。已知賦筆能千象。暫屈西軒試小眉。
冰紈初著氣如秋。五月能清大火流。窗前試聽呢喃語。怕有剛腸幾許柔。
遠山黛色有還無。似與輕烟寫一圖。馮郎不會猶憐意。肯便輕舟去五湖。

寄顧子方

與君相別兩年餘。笑我輕舟學避居。月明顏色猶疑見。難得梁溪一紙書。

定生以令子其年新詩見示因寄

前年我贈長歌日。有子方當髮及眉。讀罷新詩閣筆歎。人間何似景升兒。

我亦爲文浪得名。敢云臣壯不如人。卽看珠玉因風落。偏彊今知畏後生。
秦檜墓

秦檜江寧也有墳。道旁猶自立碑文。格天高閣終黃土。留與牛羊好逐羣。
建炎失策豈絲人。舊憾河山轉不平。大臣若獻和戎策。墓草應須向北生。

至南京

江山南國尙依然。獨見衣冠倍去年。日日除書新拜命。何人曾說舊幽燕。

江上絕句

慈湖磯畔倚寒河。對酒風聲落木多。夜泊不知江路險。月明殘荻起漁歌。
霜寒江曲映陽斜。近遠疎林隱數家。繞屋去栽烏桕樹。十年高臥擁雲霞。
空江暮色遠微微。天水無涯望轉違。霞照未收新月上。一帆清影落漁磯。
華陽陸地風波惡。姑孰姑山險阻多。肯信大江容易渡。夜深清夢畏鼉鼉。

石橋爲人作

長江不共越谿流。國破何必載女遊。十日南風吹不斷。石橋猶繫五湖舟。

偶作兩絕句

二李何王號代興。再傳楚士欲憑陵。而今盡遡從前體。敢效諸家擅國能。

本朝著作卑唐。宋頗怪文人氣習殊。細簡流傳諸集在。不知曾否駕韓蘇。

與李原常小飲杏花村非注在池州西門外

昔年杜牧爲州日。遙指村名作杏花。湖畔偶然有酒處。布帘高挂兩三家。

又有箕也詩文浪得名。每因少作愧平生之句。

聯句

七夕小集卽席聯句

鵲渡傳疑甚。子方靈津此夜茫。堂高流月影。次尾塔盡落星鏗。酒攝羣賓目。子方談飛舉座霜。屆時悽衆動。次尾脫葉逗悲商。爽吹微微急。子方羈思渺渺長。砧聞關塞切。次尾劍倚石泉遑。失職憂貧士。子方披襟怯大王。公明醉綺燦。次尾正則沐蘭芳。北渚愁何限。子方南陵埜未荒。雕詞彈燭就。次尾雄辨吃雲忙。河漢開天問。子方悲歌笑楚狂。與君忘夕永。次尾持以報新涼。子方

樓山堂集第二十七卷

詩

王午非注鈔版將竣始求得此冊補編於後

過周仲馭丹陽寓舍

十載丹陽道。懷人復幾來。不因思呂駕。誰共罄融杯。是谷皆歸海。占星已傍台。猶聞歌伐木。有徑客中開。門高龍作號。溪淺鹿爲儔。縞紵存僑札。樵蘇識閔周。林聲鶯與醉。酒色月嘗浮。君出吾忘處。相期已近秋。

自注。仲馭居鹿蹟。時將應召矣。

夏日雜興

儻室何異賣。畚臨河無意觀。魚直北幾年烽火。江東似我居諸。起居石橋半月。還往雲陽一句。吾道幽深自足。君子于野同人。

自注。黃石齋時寓石城橋。

買書終日典質。好客卒歲逢迎。吾事敢云已畢。乾坤何日消兵。

九日高座寺集楚豫諸友次侯朝宗韻

林煙漠漠草油油。客裏登高共石頭。佳節幾年曾好友。錦京此日尙神州。莫言文字消磨盡。極望蒼茫感慨留。各有故園回首憾。無邊落木助深秋。

佳時從俗也招尋。出郭幽情寄遠琴。樹杪江流疑斷續。臺前石勢故高深。三秋雲物興亡事。四海交遊聚散心。莫以落暉歸去急。攜壺能得幾巡斟。
地近何須杖策探。爲延清梵入高庵。乾坤到節偏知肅。山水於人不厭貪。寺在僧猶煩應對。林深氣亦聚雲嵐。相期潦倒尋常事。欲把離花霜未酣。

自注。高座道人。不作漢語。以省應對。

石子岡頭木末尖。游茵藉草布爲帘。下風高葉聲相積。微雨鋪煙溼不嫌。江影遙從陵樹亂。酒盃若爲客愁添。卻憐置我猶邱壑。何日虬姿欲起潛。
不須絕壑與高巖。倚檻江流雁影南。無數松杉交翠色。猶留碑版昔年銜。重陽未必口今日。羈客相逢感舊衫。作賦一時誰獨勝。敢云佳句我能咸。

美色何足恃行 自注秋試後作

美色何足恃。黃金貴有餘。不見王昭君。棄之在穹廬。妍媸憑畫手。有恨不得舒。長安雖藉藉。延壽乘高車。養女莫詫豔。但問賞何如。朝以賂宮人。暮當拜婕妤。

善射世所貴行 示內姪李男蛾時

善射世所貴。李廣終不封。白首忤人意。失道難爲庸。去病爾有幸。乏絕未嘗逢。少貴不省士。所至爲軍鋒。不託肺腑戚。安能銘鼎鐘。

江行雜詠七首

去去都城隅。清颿生廣陌。霜氣厲叢條。蕭森展寒色。賴此一帆輕。歸我三年客。窮港倚鄰船。微吟遲夜月。名場淹歲月。負我幽居盟。倏忽三十載。叩首無一鳴。作客既已倦。泛宅鮮懽情。何如歸深山。努力效躬耕。所願幸有諧。虛譽甯足營。

采石睇月明。三山發清曉。虛洲生孤煙。寒林棲倦鳥。感彼無意遭。盪我心憂悄。京國夢徒勞。故鄉非遠道。委懷汗漫游。江流信浩渺。

□□廿五載。賊躡十四年。所至殘城郭。殺人如飄烟。節鉞豈不重。代者速郵傳。安望恣摧廓。身命難苟全。感事增歎息。聲利何喧闐。才智既自竭。富貴甯久堅。不如棄空谷。東臬有薄田。

浮雲異旦夕。升沈崇朝變。大道有益虧。于野元黃戰。羣彥再當陽。積陰初見覘。含章聖所規。頡壯物之賤。憑高蹈危機。弩發何能轉。

生平有微尚。覽古如遇故。在坐詆馬融。提戈訟李固。中懷豈不偉。棄之在徒布。長幸有篇章。適以宣心素。許歷諫馬服。鄧尉規亞夫。豈無懷忠士。四顧不得呼。烽火連京洛。高車載腐儒。而我寄蓬蘚。扣舷發長吁。諸公應召出。多士亦奮庸。設壇待神明。屢世不得逢。賢者固自貴。不爲苟祿容。毋令草茅下。嚮風徒喁喁。

又聞

又聞烽火徹甘泉。還憶□□廿五年。將相一時皆起廢。聖明何日不憂邊。未傳鄭急求之武。可有秦師畏

魯連似我旅居偏。鰲泣江南愁絕限。隅偏。
南京一月赤書馳。未見勤王或濟師。憂辱已貽千古恨。酣歌不廢六朝詩。風傳海岱。名城破。藩逐淮揚。覲
吏遲。爲語公車偕計士。不知何策可安時。

贈丁丹石燿

濁世翩翮者。如君未可求。宦情匏繫視。漆室緯人憂。文藻思名世。風流感少遊。我尋夙昔口。相對一庭秋。
非注。此作于崇禎壬午。補遺于此。


本傳

同里劉 城撰

吳次尾者。名應箕。始字風之。其後更字。而名日益高。所點定經義。天下士子誦習之。故稱次尾先生。甚著。次尾世貴池。興孝鄉人。父某。隱者。家故習儒。然鄉之人。知舉子藝耳。次尾少卽獵治詩古文詞。時時曰。李何王李也。鄉之人視郡邑已闊遠。絕不達國事。次尾則喜遊通都。聞鉤致京朝興罷。朋黨始末。具曉之。鄉人好曲謹。拱揖問答。咸有尺寸。次尾獨輕脫率。己意。人審韞曲臆。而或踞坐自若。或解襪繫爬搔也。又高言指斥。辭氣湧射。屈一坐。人人指目狂生。率辟去。以是數者。聲日以起。亦用以敗。當崇禎初元。三吳中創爲復社。財十餘人耳。不佞城與次尾實共之。十餘人原缺害。未至郡十餘里。有必欲殺之者。馳諭指。乃以卒來。猝。次尾叱曰。吾不死於卒手。爾官自持刃。且巾幘漢服也。吾不去此。不得無禮我。兵官從其言。以頭入郭門。如生。歷三日。色不變。人異之。次尾雖貢高慢世。願善獎誘人才。一端之美。揚之過量。士嘗繇以得名。族子皆其成就者。余遣子鑾師之。得其指授爲多。黑面紫髯。目光奕奕。射人性喜聲伎娛樂。不肯一日鬱鬱。作窮悴狀云。子二次尾死時。長孟堅十一歲。次穉圭十歲。所著樓山堂集若干卷。行於世。論曰。今天下知有敵邑。則以次尾與予哉。予自顧勿敢當次尾也。方其矜己藐物。不謂非過。其舉事疎脫。

夫亦嘗有所規要其人材求之今日可再得哉景毅沒齒於元禮王成刻志於子堅至痛在心銜焉莫解悲

右樓山堂集二十七卷。明吳應箕撰。按先生字次尾。貴池人。縣學生。乙酉死於難。朱竹垞靜志居詩話稱先生羅九經。二十一史於胸中。洞悉古今。與亡順逆之迹。當崇禎中。預料燕京之必不能守。聞者皆笑其迂。而先生持論侃侃不阿也。名雖不登朝籍。而人材之邪正。國事之得失。瞭如指掌。撰有熹朝忠節傳二卷。兩朝剝復錄十卷。留都見聞錄三卷。東林本末六卷。續觚不觚錄二卷。陳迦陵湖樓集。稱先生嘗以所撰國璋集相示。嘆爲經術暢茂。搜葺詳雅。無何而觸機蹈。故此書不傳。又稱觚不觚錄。議論絕有根據。復有留都見聞錄序。迄今與竹垞所稱各書。均未見。傳者獨是書耳。分宜張爾公嘗稱先生人文似陳龍川。詩旨類屈正。則可以飛繁霜。泣鬼神。詩旨類正。則先生之遇爲之。人文似龍川。竊謂有過之無不及也。憶幼時讀侯朝宗壯悔堂集。有是書序。稱先生文如日星河嶽。竊疑其推挹之言。又稱先生嘗云。文章自韓、歐、蘇、沒後。幾失其傳。吾之文足以起而續之。亦竊疑其自譽稍過。迨今得是書而讀之。始知其前無古人。後無來者。其指陳時事諸作。實不減賈長沙、董膠西、劉中壘。迦陵又稱先生史論高文遠識。成一家言。有極筆之嘆。又稱每讀集中論史諸作。時而悲歌起舞。旁若無人。時而作爲變徵聲。泣數行下。其感人固如是耶。又壯悔堂集祭先生文。有云。明三百年。獨養此士。嗚呼。唯先生不愧此言耳。咸豐癸丑小寒日。南海伍崇曜跋。



交 行 摘 稿

徐 孚 遠 纂

交行摘稿

本館據藝海珠塵
本排印初編各叢
書僅有此本

交行摘稿

南匯 吳 省蘭 泉之輯

華亭 姜 兆紳 如山校

徐孚遠篤

孚遠字聞公。晚號復齋。江南華亭人。明崇禎壬午舉人。有釣璜堂存稿十七史獵俎一百四十五卷。

同黃臣以張衡字行交海

交州南去是長安。霧重風輕道路漫。回首滄浪爲客久。龍神款款別離難。

入交港同行者或云此中有似三吳感賦

曲曲溪流面面田。海濤盡處好牽船。江南風土渾相似。吳會交州共一天。
種竹栽桑養子孫。處處雙鬟坐市門。客路相逢開一笑。何須津口問桃源。
風帆高掛入青畦。春水方生路不迷。夷女看人渾未識。笑聲啞啞滿前溪。

同黃張祀伏波將軍廟歌

自古中興稱建武。將軍挾策求真主。東廂一見展筵謀。腰懸組綬分茅土。晚年仗鉞向炎州。樓船下瀨漾中流。朱鷺已定曰南服。重開七郡獻琪球。靈跡千秋銅柱存。蠻夷長老咸駿奔。至今廟祀江之漭。舟師日薦芳蓀。我從國變山中哭。鳥折其翮車無軸。衰老難跨上將鞍。麓疏方似當時璞。一聞交海近行都。便

隨商船駕雙鳧。高橋狎浪看轉側。陽侯驤首凌天吳。忽然濃霧迷南北。天地暗慘長年惑。長年無計焚片香。歸命將軍頌明德。須臾雲淨四山開。如見拓戟光徘徊。從此揚帆兼命楫。擊鼓吹簫取道來。沙淺江平識去津。翩翩蝴蝶引行人。我行祇謁神祠下。青青竹色水粼粼。古碑斑剝字畫漫。執圭衣黼著蟬冠。酒馨牲腍來夷女。拜手陳詞看漢官。將軍上殿喜論兵。聚米還成山谷形。此曰聖王方借箸。好將圖畫入承明。

贈安南范禮部

名公著儒稱尙書

十載風塵臥翠微。今來假道赴皇畿。未聞脂秣過賓駕。更有荆榛牽客衣。生似蘇卿終不屈。死如溫序亦思歸。南方典禮惟君在。僑胥相期願弗違。

贈黎禮部

名敦。僭稱侍郎。有詩三章贈余。

孤臣萬里誤投鞭。王帛將來更負愆。未得搏鵬游碧落。可能放鶴反青田。再生馬角真何幸。一惠魚書喜有緣。此日交期良不淺。河梁詩句古人傳。

題南越王尉陀廟

遺史千秋一丈夫。却瞻祠宇薦靈芻。乘時截嶺分秦地。折節開關綰漢符。樹葉青青藏雀卵。碑文黯黯辨龜趺。陸生使後誰人到。猶喜相聞新語無。

交州漫題

臨流日對草萋萋。握節交州顏色低。賓館嗟無端木駟。蠻方賸有子卿羝。每懷反轡身何託。實恐朝天路

欲迷。聞道樓船今佩印。前旌已渡武陵溪。
南來虛負一帆風。王會猶然苦未同。披髮夷人何意氣。擔簦客子甚怔忡。四分州土非全國。三統雄師有上公。休恃文佳嘗反側。獻俘終入大明宮。

在交日久傳語日變莫測其情。或言舊唐人有洩余姓名者。故愈欲余謁晤而甘心焉。

風霧蕭蕭嗟遠道。主賓擾擾誤虛名。誰占李耳車前氣。欲絕淳于冠下纓。豈是鬚眉真有異。從來頭足自當明。雖然周室非全盛。王會開時南海清。

晦日同臣以衡字

清光煜煜雨霏霏。夷服夷言相刺譏。客裏三人如貫索。舟居兩月似圓扉。宋臣真喜華元反。漢使難期谷吉歸。此日已爲春盡日。雲雷猶自感天威。

四月朔自後不作題
以日爲次

從王喜甚赴蓬瀛。誰料南行荆棘生。蝸角真爲蠻氏戰。蠅營擬作伯勞聲。窮途自覺諸緣盡。守禮應知一死輕。若遇九原交友在。問余來此有何名。

二日

天公何事久陰陰。晴雨無期似客心。夏甸幾時巡鳳輦。春光難可變鴉音。不堪異類思微服。遙念同朝憶故簪。終日溪流流未徹。那能滴淚到滇黔。

三日時聞有兵至粵。若將可待而竟寂然。

金馬空傳不可徂。相聞洱海下王鈇。輕粟皆出禁中旅。留滯還同西域胡。每羨遊鱗能赴壑。只憐苞羽尙囚笱。元戎布算今須定。爲取蘇卿入帝都。

四日

志欲吹簾慮未詳。忽然鼓棹入蠻鄉。嘗懸北闕心如日。一到南方鬢總霜。羽翼摧傷同蟻蛭。騰驥無計羨飛黃。井蛙有國堪尊大。不異當年笑子陽。

五日同黃張飲歌

上已之後到交州。可憐五日尙淹留。夷人喜怒不可知。羗羊能乳在何時。雖有夷釀嘗盈缶。滴似督郵難入口。舉杯消愁愁更添。離騷一篇空在手。今辰呼童整我冠。有人遣我東洋酒。酌之其味醇且醲。相勸何論升與斗。偶然下箸兩三盞。白者赫泥青者韭。帝都飛鳥尙茫茫。嘆我年來已老醜。飲罷起坐撫吳鉤。清音泠泠如欲吼。

舟中雜感

屈指乘桴今幾時。推篷匡坐強支頤。十年荒島心常苦。一拜夷王節又虧。玉帳久懸都護檄。蠻鄉空寄少卿詩。遙聞吳楚將龍鬪。不禁臨風泣路歧。孤舟盡日雨瀟瀟。賓從無聲不自聊。臣節當墜中路阻。天威未振小夷驕。狂來欲借琴高鯉。騎去應吹伍

負簫使客雖然失意氣。前軍還有霍粟姚。
浮雲澹澹水悠悠。壯志難消感魏牟。鼓角每愁銅柱路。夢魂猶戀碧雞游。一葵向日知無補。羣策支天恐未周。從此回舟何所事。還應驅浪大江頭。
擬向龍門不是津。春餘涉夏又盈旬。未能芳餌求璜玉。且就青溪戴葛巾。避跡便同朱處士。無言真作息夫人。只愁川谷將來變。歸路何從問四鄰。
天末猶餘此一隅。昔賢嘗亦有經塗。子初遠跡終能反。士燮遺風尚在無。回首年華真冉冉。傷心枯菀嘆烏烏。何時好鼓閩南棹。堅臥山中號小巫。
千行涕淚王威弱。三月拘留臣節艱。來日無能假宋道。歸時猶恐滯秦關。賈人歡喜金錢會。使客蒼黃髮鬢斑。安得禁申求頗牧。早施長策定南蠻。
蘇卿臥雪窮邊日。漢將揮戈出塞時。甲第連雲軍氣盛。羝羊荒草使臣悲。節旄欲盡天寧感。雁帛難傳人豈知。悼古傷今空涕淚。臨流無計強題詩。
嗟爾蠻人何種生。先朝棄此海南平。身紆劍佩觀無用。口學盤杆說未成。鵬遇長沙須作賦。梟逢軒帝卽爲羹。孤臣眞悔輕衣袂。日日溪頭蒙惡聲。

與臣以論行止

兩朝奉勅輜軒使。六袞行年丘墓身。山裏芝田方煒煜。舟中鶴侶尙逡巡。余將臨屐看青壁。子擬吹簫謁

紫宸心事相關重執手。他時能訪五湖濱。

偶題示黃張二君

寸丹耿耿豈能要。笑爾蠻夷空設朝。自擬劉綱經百鍊。誰憐堯莢已三凋。傷心舊侶籠中鶴。側目秋風韜上鶴。何日天南飛尺一。相將攜手上青霄。

擬歸鷺

十年一度擬朝天。及至中途又渺然。主聖已開溫室待。臣愚只有海槎緣。身隨碧浪如流去。望斷紅雲不可前。伏處時多行日少。自傷才力愧張鶩。

遣懷

出岫孤雲何所依。臨流菴竹正菲菲。軒皇芝蓋三春動。旅客征帆六月飛。便擬相如懷璧反。誰憐季子敝裘歸。行年已邁磻溪杳。好把漁竿上釣磯。蠻俗真知賈客豪。使車至止亦徒勞。謾將玉帛人誰答。默禱神祇天愈高。何吉凶詢季主。爲醒爲醉感離騷。傷心有似孤飛鶴。引吭長鳴徹九臯。

土風

賓至誰來慰寂寥。公衙不啓是虛朝。周官何必稱多士。齊國惟聞有豎刁。辭設詛盟交道絕。館籩牢醴客心搖。倒懸頭足堪流涕。何日問天天路遙。

得意中官故喜豪。嘗將絲竹擬雲璈。盡搜漢物如過市。約略方言似旅獒。蠻女跣行窺玉節。夷男箕坐弄霜毫。此州本屬王封外。何事來游紆佩刀。

懷王先生

歲歲波濤只此身。未曾一刻惹胡塵。嘗隨魯仲逃東海。亦與無功作近鄰。桂老山中空偃蹇。簫吹江上又遭迤。從今便斷朝天夢。慚愧當年化杖人。

再懷王先生

生平二老髮俱華。執手徘徊嘆路賒。適野於今方失道。臨河往日亦回車。清奇未絕彈流水。紫氣全捐感饑邪。相見勿言人世事。溪邊依舊種桃花。

與黃臣以論次人物懷唐梅臣先生

先生正始彥。神理靜以淵。俱客島嶼間。杖履日周旋。吟咏時有作。壺觴亦聯綿。相待以送老。遂忘陵谷遷。非有魏牟心。戀闕猶惓然。每遇天邊人。繾綣情何專。黃郎捧璽書。抱病客邸眠。省視不踰日。餉藥兼給鮮。滄浪各有適。含意俱未宣。朔風何栗栗。海流何濺濺。懷人不可見。森渺隔山川。梁月無米時。贈以瑤華篇。

西望

自嘆今來行路艱。側身西望淚漣漣。已聞貳負真藏穴。未報單于請款關。南徼金根如欲動。中原玉斧故須頒。驅車不濟深惆悵。碧海炎風空往還。

雲車何事久南徼。軒帝巡游路不遙。中道每愁夸父渴。偏隅或阻百靈朝。明堂開處須公玉。五服惟時命趙堯。蹇足未能陪法乘。回舟夜夜望招搖。

聞道齊桓建一匡。孤臣中夜倒衣裳。虎符未見催金葉。節使徒憐困竹王。實恐蘭生同翦伐。難言雲路好翱翔。故人海內無存者。誰撰招辭下大荒。

不見文淵西下期。空餐交米望王師。壁間劍有悲鳴感。雲裏鳧無首路時。杜甫雖忠心轉拙。范增已老計非奇。從今便絕冠纓客。結伴山中共采芝。

隱語寄馬金吾

聞馬將至時其國檢索嚴甚。書之屬問遺之竟屬訛傳。

帛書悲未達。黃鳥有哀鳴。願假盧耽鶴。相邀上玉清。

傳周漳平將至亦作隱語未達也。

節旄將盡落。馬角幾時生。寄語專麾帥。飛鳧密見迎。

松月歌贈臣以

黃郎好奇性亦別。蒼古如松冷如月。買絹數尺倩妙手。畫之作障清神骨。虬枝偃蓋蟾吐暉。晚霞初散雲氣微。移置長廊恣高臥。月色松聲交入帷。

贈寓交者蔣漸遠

我入交州何所得。君來相訪若有覲。不巾不履神貌殊。自言混迹人無識。一從去國幾何年。往日冠簪今

渺然。姓氏真同梅尉隱。方書多自葛洪傳。知君夙昔有兼才。筆墨紛紜入手裁。且莫佯狂長棄世。遙聞天
廡選龍媒。

贈寓交林明卿

交州聊借一枝棲。逃名似入武陵溪。不商不宦無世事。閒寫青山手自題。筆墨時隨烟霧迷。周人冠弁漢
人衣。河干來訪語依依。看君非復忘情者。天南重見五雲飛。莫使嘗占作少微。

臣以在交善病病熱也歌以發之

知君夙昔苦炎蒸。三伏沉沉病欲增。安得遠求千歲雪。颯如近對滿壺冰。窗前企脚追彭澤。嚴下科頭彈
廣陵。且學枚生歌一發。卽看榮氣灑然升。

歸丹

何處可容我。只宜桴海中。衣冠千古事。舟楫四時風。塵世浪頭碧。勞人魚眼紅。皇輿猶轉側。客子固須窮。
交州有鬼門。關舟行過關。乃入華界將歸作

交行將過鬼門關。及至斯關又遣還。天路難階鬼亦厭。只宜流落在人間。
周漳平有書至寄書者被其國重罰信音絕矣

一封書寄卽爲災。重把關門不放开。幽谷無春日欲暮。上林飛雁幾時來。
將回贈臣以職方時臣以議欲開道行復命也

瀚海吞氈報漢恩。蕭然反棹不堪論。軒車高蓋誰迎者。辦得芒鞋朝至尊。

行瓊海入一線沙亦名角帶沙危險萬狀吾輩三人自擬必死矣口占

何事舟行入線中。更憐瓊海道難通。淺沙仄逼三篙水。惡浪交加四面風。端笏未期門下省。排衙將赴水晶宮。天公不擬亡周室。銜石瑤姬結恨同。

仗長已誤入一線沙。以出沙爲艱。欲沿山而行。將抵瓊州海口。乘風直過。吾輩難之曰。若遇虜舟。則奈何。仗長曰。昔年曾過此。虜無舟也。主舶者利得速出。亦以爲然。衡宇疑曰。昔卽無舟。安知今不有也。臣以大笑曰。瓊大郡也。以海爲固。聞王師將出粵東。必且造舟自備。豈無數艦爲我難乎。然無以奪其說。自二十七訖朔日。至紗帽山。西南風卽出矣。乃值東風。不可行。未刻見一八櫓船來。始惶駭。未及治備禦。已發一銃相加。又見二舟出。始反棹乘東風疾行得脫。

漢棄朱崖已數年。王人那到海南邊。舟工自謂乘槎便。港內艤艫正鬱然。港內艤艫正鬱然。將施蠆箭吐蛟涎。皇天不與衣冠入。故作東風阻客船。履危將欲哭途窮。且喜先機遇好風。笑爾艤舟終日待。鯨魚已放碧流中。

自線沙出得西風。可至大洲頭。始爲通道。行至初五日。已報過洲頭。風輕流迅。退回生門死路。大洲頭已過。仍回客更愁。目斷長風。凡九日。心懸少女似三秋。

行大洲頭歌

斗量米斛量水。諸君吾子皆相齒。番舶之行古如此。我來日日大洲頭。何如朝暮在黃牛。東風至。西水流。神山只在海中浮。脣焦口燥不得語。疎勒飛泉那可求。南風氣盡溯洲頭。不及西風一夕流。自古乘時人力易。何須鞭石駕飛虬。

七夕西風過大洲頭

天上榆花方報秋。張騫也渡海南洲。緣知此夕真良會。少女當陪織女游。

將至大星連日暴風。粵中水師皆有怨我故作末二句。

南海行幾一月程。狂風號怒客魂驚。鞭驅岡嶺青冥覆。浪湧鼉鼉白晝鳴。鮑子憤時原不惜。幼安思過喜猶輕。眼前水怪紛然現。何必燃犀始別名。

舟行迷道作

交州古號越裳國。其使來朝歸不得。聖人作法示指南。舟人傳之爲準則。今日針師何等閒。羣峯指點有無間。掛帆疑往又疑還。屢行七聖俱迷道。不見閨人夢裏山。

附小傳林霍

先生名孚遠。字開公。松江華亭人也。上世居汴梁。爲宋朝宗室。高宗南渡時。分封於浙之湖州郡烏程東山徐溝村。以地爲姓。避亂隱居。終元七世。無一出仕者。至太祖宗周佛子公。始出仕爲參計使。子若孫接踵登第。永樂朝。遂有一堂六進士。四世繼三公之謠。至先生曾伯祖階。世宗朝爲上柱國。歷仕三朝六十

年相業。諡文貞。曾祖陟。世宗朝爲司寇。祖琳。爲楚雄守。叔祖口。爲山東撫軍。以賑民飢。損家貲四十萬。全活數百萬生靈。上嘉賴之。賜爵上公。父爾遂。由恩蔭食二品俸。養高不仕。先生爲伯子。少時與周立勳。陳子龍二先生皆治毛氏詩。以詩文名世。時人號爲兩脚書廚。旣又與同郡夏允彝。婁東張溥諸巨公爲古文社。並負重名。崇禎壬午。登順天賢書。癸未。族弟售。而先生下第。越一年國變。乙酉。南都潰。唐王卽位于福州。爲隆武元年。先生航海入閩。道信州。晉謁黃道周公。一見如舊識。又爲疏薦於朝。時福州改爲天興。先生至。爲天興司理。斷獄平正。尋擢兵垣。三遷而爲左都御史。東兵下漳泉。五日而皆臣服。未嘗加一矢。歡聲動地。丙戌八月。閩潰。車駕出奔。丁亥。扶桂王卽位。改元永歷。五月。貽書舟山。肅侯黃斌卿。事洩。走舟山。會監國魯王至。因抵鷺門。在同安嘉禾山原香中左所。鄭成功聚兵處也。地奉永歷正朔。勅使由行在。而至者相望。凡建議舊臣皆晉秩。先生詔爲光祿大夫。柱國少師。命佐成功鎮臺灣。成功以師禮事之。舉動必請命以行。成功世爲大將。隆武朝賜國姓。任百閩招討使。永歷帝始封漳國公。以不從父逆。又封延平王。當丙戌閩潰。勸父芝龍勿受招。芝龍勿聽。自率所部入海。時同行者先生首倡。有大學士魯公擢。江右峽江人。兵部尙書盧公光騰。同安人。少司馬王公忠孝。惠安人。林公蘭友。仙遊人。沈公佺。期南安人。其餘如魯王舊臣。浙張公煌言。舟楫相尋於海上。不可一二數。先生在島。與紀先生往還如兄弟。霍庚寅冬。與友人訪紀先生。因得獻所作詩。爲先生許可。辛卯歲。漳國南下。三月。兵襲島上。先生同部職方黃忠郡督張自新。泛海赴行在。三月至交州。與交南西王爭禮。不得進。先生與王書曰。孚遠聞之。竭誠以報國者。

貞臣之良軌也。卹鄰而敬賓者，賢王之茂德也。二者相遇而相合，然後功烈著於當時，名聞傳於來禩也。自我宣宗皇帝從三楊之請，崇立貴國，始重以使權，繼隆以王號，而貴國二百三十年來，輶軒歲至，球幣無愆，稱爲知禮之國。我列聖所以嘉獎，賜亦無替也。自妖氛狂熾，三京淪陷，永歷皇上正位南極，側聞貴國遵正朔，重冠裳，孚遠等是以聞義而假途也。孚遠，江南之腐儒也，受國恩者八代，藉先人之餘蔭，擅文筆之末藝，義難蒙面，破家殺子以報大讐，事未克集，乃入閩，事隆武皇帝，又以運屯，同賜姓，藩大集勳爵，結盟連義于閩島，與賜姓藩爲寮友，養精蓄銳四十萬，待時而動。十三年于茲矣，蒙皇上寵召，亦數次矣。黃職方事忠者，亦以起義，母妻被殺，奔走王事，屢入虎穴，至死不避。皇上命之賚奉詔書，至賜姓藩營，約以進兵，賜姓藩遵奉會合羣帥統軍大帥，將直抵金陵，遣張都督送孚遠等于朝，恭報師期，催發晉蜀韓三藩，同逼江北，以殿下世兄弟，玉帛歲通，歡好深切，求殿下慨然送行，初至，張都督具啓謁見，未獲請，孚遠等以乍涉驚濤，兼之暑熱成病，未得具啓，深用歉然，伏承殿下垂問，遣醫治療，德甚厚也。孚遠等豈敢自寧，擬卽日樞謁，而猶有未敢者，蓋交情與國體兩盡而不相礙，則自處處人，方爲合美。自我朝遣使至貴國，二百餘年，載在國典，祇行賓主禮，此貴國先王及賢大臣所共知者也。惟去歲秦魯二藩遣使來，用拜禮，二藩雖貴，乃大明之臣，與貴國敵體，其所遣使，乃奔走未弁，爵不列於天朝，名不聞於閭巷，先王宴而賚送之，不爲薄矣。今張都督貴官不同於前，然在賜姓藩下，奉書拜謁，於禮無譏。若孚遠濫居九列，事忠恭承王命，有異於是，伏惟殿下訪諸大臣，得遣一兩員來，與孚遠等商定，使孚遠等有以受教于殿

下有以不獲罪於朝廷。不貽譏于天下萬世。殿下之大惠也。孚遠等之至願也。自來名賢假道而成境外之交。爲千秋之美談者。往往而有。詞繁不敢多贅。惟殿下念孚遠等之赤心。天下之善一也。禮待而速遣之。豈惟孚遠等懷德。卽皇上亦有晉錫。諸藩亦慕義無窮矣。書竟不報。先生不得已歸島。與霍書曰。交行之不得達。有不偶者數事。非筆墨所能詳紀。石老能傳之也。聞粵東猶可以達。特險耳。今天使黃兄尙在。明春須問途。不肖固不惜命也。噫。可見先生之志矣。當其歸島也。行瓊海一線沙。亦名角帶沙。危險萬狀。先生三人自擬必死矣。伙長已誤入一線沙。以出險爲艱。欲沿山而行。將抵瓊州海口。乘風直過。先生三人皆難之。然無以奪其說。自五月二十七日訖朔日。至紗帽山。西南風。卽出矣。乃值東風。不得行。見一八槽船來。未及治修禦。已發一銃相加。又見二舟至。始返棹乘東風。疾行得脫。自線沙出。得西風。可至大洲頭。始爲通道。行至初五日。已報過洲頭。風輕流迅。退回。至七夕。西風始過。將至大星。連日暴風。粵中水師。皆有怨於我。又舟行迷道。嗚呼。先生可謂艱難險阻。備嘗已熟矣。庚子歲。遙聞永歷帝遇害。辛丑延平王取臺灣。壬寅五月王薨。元子經嗣位。癸卯十月。鷺門破。經退守銅山。先生遂南帆。臨別。執沈佺期公手流涕曰。吾居島十四年。只爲大明一片乾淨土耳。今遇隕覆。不得已南帆。待送兒子登岸歸故鄉。守先人宗祧。卽返。而與諸公顛沛流離於海外。雖百死無悔也。詎知事與心違。轉徙入潮之屬邑山中。竟全髮痛憤。連嘔血數升而歿。爲乙巳歲五月二十七日。距生萬歷己亥年六十有七。

東海先生姓徐氏。名孚遠。字闇公。華亭人。高祖贈少師公。黻生二子。長文貞。公階。次司寇公。陟。先生曾祖也。立朝有廉讓名。祖琳。官至楚雄太守。有幹略。好行其德於鄉。父太學公爾。遂以文行知名。生三子。長卽先生。次鳳彩。少致遠。先生天性沉敏。篤志力學。精力過人。晝夜不倦。經史百家之言。一覽成誦。終身不忘。自爲諸生。文譽日盛。是時同學若周太學。勤卣。杜職。方仁趾。夏考功。允彝。陳黃門。臥子。彭孝廉。燕。又與先生而六。當世所謂雲間六子也。復倡爲幾社古文詞之會。同著壬申文選。行於世。兄弟皆治毛鄭之學。先生覃精六藝。風雅之家。皆師事之。仲氏以多識著述成一家言。少弟負才善交遊。時有雲間三徐之目。先生矻矻力學。以讀書論世爲宗。於史學特稱淹博。每同人高會。上下古今。或有遺忘。必質之先生。應對若流。羣疑盡釋。四方問字而至者。戶外之屨常滿。江左文風。翕然丕變。咸推爲東國人倫云。壬午舉于北闈。年已四十有四矣。癸未南歸。旣而有甲乙之變。先生慨然奮袂而起。指其髮而誓曰。此卽蘇武之節矣。我寧全髮而死。必不去髮而生。從容就義。非難事也。但今天下之勢。猶父母病危。雖無生理。爲子者豈有先死而不顧者乎。倘我高皇帝尙有一線可延。我惟竭力致死而已。遂與夏考功。陳黃門。謀勤王事。不克。入於湖。湖中遇兵。與家相失。姚氏赴水免。長子度。遼殉焉。先生間道徒跣。涉江。踰嶺。奔赴行在。時同郡張公。鯁淵在閩。見之驚喜。爲具湯沐。治衣冠。奏聞行在。詔除福京司李。忠勤辛苦。不避艱難。丙戌六月。除兵科給事中。秋八月。行在去閩。閩中亂。先生棲遲閩粵。朝夕哭拜呼高皇帝。戊戌歲。滇南詔命徐公都御史。至交州。與安南定王爭禮。不得達而返。灑以癸巳客於閩之清漳。漳有王生之鄰者。一日遇於途。執手語曰。

子鄉徐先生亦苦矣。夷齊之行，不是過矣。余驚曰：先生何在？曰：在山中。余曰：無恙乎？曰：嘗自握其髮，撫其膺，哭呼高皇曰：孤臣惟以髮爲節，以詩書爲友。從容俟死，以事陛下於九天耳。語未竟，途人沓至，揮手而別。余惘然自失者久之。因賦詩二章云：不見徐孺子，飄零已十秋。依劉寧失策，復楚更何求。鴻雁春前到，魚鳧夢裏愁。盈盈成異域，歧路淚空流。爾昔奔行在，鄉書竟渺然。那知閩嶺上，猶得故人憐。著述存遺獻，兵戈又隔年。相思一相慰，白髮喜盈顛。及遷遊楚，有郡守朴君懷玉先生弟子也，揮淚謂余曰：吾師居山時，有勸爲僧歸鄉者，吾師叱曰：吾爲孔孟之徒，豈能依釋氏偷生乎？頭可斷，髮不可截也。先生著書甚富，每云十七史後學苦其浩繁，不能遍讀。東萊呂氏雖有詳節一書，而又削去宋、齊、梁、陳、魏、齊、周七史，未成全璧。因數更寒暑，纂成十七史獵俎一百四十五卷，真讀史之津梁也。又著詩五千餘首，以抒其忠憤較之心史，無以加茲。未知鐵函何時復啓。晚年自號復齋，蓋寓意云。歲在乙巳，有同郡故人遊潮，道經饒平，過訪先生，握手道故，意氣如初。益壯不少挫，輒呼高皇帝仰天而拜。故人有慚色，亟辭歸。先生固留之，不得。痛哭而別。別後哭不止，連呼高皇而卒。春秋六十有七。同郡宋尙木時守潮，屬友張子退經紀其喪，爲治舟車。次子永貞侍母戴氏扶柩歸里。先生娶於姚，生子度遼。先卒。在閩娶于戴，生子永貞。又卒。宗黨僉議謂先生爲司寇冢孫，不可無後。乃立仲弟鳳彩孫懷瀚爲嗣孫。禮也。己未仲冬，懷瀚奉先生暨配姚氏戴氏祔葬於太學公墓之昭位。永貞暨配宋氏祔於旁。先是先生出亡時，潮海風濤，家門岌岌不自保。仲弟力護墳墓，終身勿離。少弟奔走急難，傾身下土。由是家門得全。先生兄弟孝友，生死一節若此。人以爲

三徐之目。不愧殷之三仁云。灑惟先生文章若班孟堅。經術若鄭康成。德量若黃叔度。博物若張壯武。天下所共知也。若乃大義所發。勇踰賁育。忠信之行。孚於蠻貊。流離患難。舍命不渝。水火不能侵。鬼神不能違。卒之履險若易。全髮而終。夫豈一節之士。張儉趙岐之流。所可同日語哉。殆孟子所謂浩然之氣。塞於天地之間乎。抑子思所謂天下至誠能盡其性者也。世無中郎。誰爲碑有道者。灑不敏。少受先生教。雖愧無文。不敢不勉。稱東海先生者。鳴所志也。

